


فنانين لكن ظرفاء

رؤية ساخرة لمواقف حقيقية



د. مصطفى أصيل

فنانين لكن ظرفاء

رؤية ساخرة لمواقف حقيقية

د. مصطفى أصيل

فنانين لكن ظرفاء

د. مصطفى أصيل

تصميم الغلاف للفنان / أحمد فريد

دار

البديع العربي

للطباعة والنشر

ت / 01061635162

رقم الإيداع: 29612

التسجيل الدولي: 9-0591-94-977-978

إن الآراء الواردة في هذا المصنف لا تعبر بالضرورة عن
آراء وتوجهات الناشر وإنما تعبر عن رأي المؤلف فقط

يمنع نشر أو نسخ أو ترجمة هذا المصنف أو جزء منه بأي وسيلة
تصويرية أو إلكترونية أو ميكانيكية بما فيها التسجيل
الفوتوغرافي و التسجيل على أشرطة أو أقراص مضغوطة أو أي
وسيلة نشر أخرى بما فيها المعلومات واسترجاعها بدون إذن
كتابي من المؤلف طبقاً لقانون حماية الملكية الفكرية رقم ٨٣
لسنة ٢٠٠٢ والقوانين المماثلة لها

إهداء

و شكر خاص

شكرا لكل فنان رسم البسمة علي وجه زملائه بقصد أو بدون قصد ، ليهون عليهم يومهم الطويل ، فالضحكة هي التي تمحو متاعب الحياة ومشقة العمل، وشكرا لكل زميل لم يبخل علي بسرد موقف ، أو حكاية من الحكايات التي لا تنتهي من حكايات الفنانين الظرفاء .

د. مصطفى أصيل

الأنابيب ...

كان في عازف أورج معروف عنه سرعة البديهة في الرد، وبخفة الدم ، وف مرة بيعرفوه علي مطرب كان تنك و مناخيره في السما ، وكان المطرب ده عنده مستودع أنابيب ، بس ناس قليلة قوي اللي عارفة ،ومن ضمنهم عازف الأورج ، فبيعرفوهم علي بعض قبل ما يشتغلوا ، فالمطرب قاعد بتناكة وبيتكلم بتناكة، فبدأ عازف الأورج يتضايق منه، لغاية أما جت الفرصة لحد عنده لما وجهلة المطرب الكلام وقله : إنت معاك أغاني قديمة كتير؟ فرد عليه عازف الأورج : أيوة ، قاله : زي إيه كده بتعزفه بتمكن ؟ ، قام صاحبنا رادد عليه بنرفزة وتلقائية سريعة قلوا : زي أنبوبة بعثها جواب (أمونة) وضي الأنابيب (ضي القناديل) وأنبوتي الحلوة بقت حلوة (أمورتي الحلوة) وأنابيب علمني الحب (أنا مين علمني الحب) فضحك كل الفنانين وإنتهت بخناقة كبيرة بين الإثنين.

عازف المظهر

في آلة إسمها المظهر، شكلها شبه الرق بس أكبر وأثقل والشخايل اللي فيها كبيرة ، والآله دي بتبقي في فرقة الزفة ، وصوتها عالي جدا وخاصة الشخايل اللي فيها ، فكان في مره عازف إيقاع علي الآله دي شغال بضمير قوي وعمال يرزح جامد عليها ، وفي واحد كان واقف بيراقبه بانتباه ، فالعازف لقاه منتبه قعد يشتغل بحماس قوي عشان يلفت نظرة أكثر ، فقرب منه الشخص ده وسلم عليه بعد الشغل وقله: أنا عايز حضرتك في تصوير في التليفزيون بكرة والحلقة هنتذاع الإسبوع الجي ، وطبعا العازف كانت فرحته متتوصفش ، وفعلا راح وسجل لوحده عزف إيقاع منفرد وبحماس ، وكان أقوى من العادي ، تليفزيون بقه ، وسأل علي معاد إذاعة الحلقة وعرف معادها ، وقال لكل أصحابه ع القهوه وقرابيه في البيوت يتابعوها، لآكن هوة قرر إنه يتفرج علي الحلقة وسط صحابه وحبابيه عالقهوه ، يشوفوا بقه صاحبهم وهوه بيتولد نجم شهرته ، وفعلا بدأ البرنامج وكان هوه أول فقرة والإبتسامة والثقة علي وشه في القهوه ، وبعد ما فقرته خلصت وقبل ما يلحق حد يفتح بقه ظهر المذيع وقال : أعزائي المشاهدين إستمعنا لأحد أولي نماذج التلوث السمعي والضوضاء في مصر ، فطبعا ضحكت كل القهوه وصاحبنا كان في نص هدومه .

الليل يا ميمون

كان في عازف رق دمه خفيف جدا ، دخل مرة قهوة
بيتجمع عليها الفنانين ولمح حبل موجود في القهوة ، فقال
لواحد صاحبه: إنت تعرف إن أنا ممكن أخلي الرق
يمشي علي الحبل من غير ما يقع ، ويفضل رايح جي
عليه ! صاحبه قلّه: إزاي يعني؟ قاله: مش مصدق طيب
أنا هخايك تشوف بعينك ، بس إفرد الحبل ده ولف طرفه
حوالين إيدك وإنزل بركبك علي الأرض، فصاحبه
الفضول خده ومسك الحبل وشد طرفه وعمل اللي قاله
عليه بالظبط ، فراح صاحبه شادد الطرف الثاني من
الحبل وراح مطلع الرق وقعد يقول: الليل الليل الليل يا
ميمون ، وطبعاً كان كمية ضحك لا توصف لأن زميله
كان فعلاً في موقف شبه القرد بالظبط.

كوبري عباس

مرة عازف عود شغال مع مطرب ، وكان المطرب بيخليه أحيانا يغني أغنية ولا إثنين لو عاوز يريح صوته شوية، فصاحبنا ده كان جي في يوم وقت الانفلات الأمني في ثورة يناير وماشي علي كوبري عباس ، طلعا عليه إثنين حرامية خدوا منه الأبياد بتاعه ، وبعد ما مشيوا بخطوتين قلمهم : إستنوا الجهاز ده عليه شغل مهم والنبى ، هاتوه وخدوا كل اللي الفلوس اللي معايا ، أنا معايا متين جنبه وإدوني الأبياد ، قاموا راجعين قالوله : هات المتين جنبه وعملوا أنهم هيدوله الأبياد ، وقاموا واخدين المتين جنبه كمان مع الأبياد وهربوا، فطبعاً وصل الشغل في قمة الحزن ، والمطرب مصمم يخليه يطلع يغني أغنية وهو رافض ، وفي الآخر بعد إلحاح وزن من المطرب ، قام ماسك المايك غصب عنه وراح مغني: علي كوبري عباس سرقوا مني الأبياس ، وطبعاً الدنيا إتقلبت ضحك علي الإيفيه اللي طالع بتلقائية مع حالة الحزن.

البيز جيتار

من المواقف المحرجة جدا إن واحد يفكر إن حد معجب بيه ويطلع عكس كده خالص ، فمرة واحد عازف بيز جيتار ، والبيز جيتار للناس اللي متعرفوش هوه شكل الجيتار العادي، بس مبيتعرفش عليه أغنية ، هوه بيدي هارموني مصاحب زي الكونترباس كدة ، المهم عازف البيز جيتار ده كان شغال في فرقة بتحيي أفراح ، فكان نصيبه إن الفرحة ده معمول في شارع ، ومش بس شارع بس ، ده كمان كان في قرية من قري الفلاحين ، يعني أغلب الموجود لو مقلوش علي البيز جيتار ده بندقية شيخ الغفر وإسقرت ، فاللي فاهم منهم هيفتكروه عود بيعزف الألحان . بدأ الفرحة والعازف عمال بيدع وشغال ومعلي الصوت ، وفي حد من المعزومين متابعه ، وعمال يبص عالجيتار ويبصله ويبص علي إيده ، وعالحال ده وبيبتسم للعازف والعازف يعلي الصوت وييدع عشان المعجب يستمتع ، وف وسط الفرحة بعد مرور ساعة ندهله الشخص المعزوم ، وصاحبنا راحله بكل فخر قلبه: أوامر راح رادد عليه وقله : متقفل البتاع ابن الجزمة اللي صدع أبونا ده .

بيز جيتار ٢

مرة برضه عازف بيز جيتار شغال في فرح شعبي في الشارع ، وطبعا البيز جيتار زي ما قلنا مش معتاد ولا مألوف وجودة ، ونادرا لما بيشتغل في الشارع ، وبيبقي غالبا مع الفرق الكبيرة والبندات في الفنادق والنوادي ، المهم طلع واحد يرقص بسنجة (سلاح طويل زي السيف) ، وشكله مش عاطفي شبه البلطجية والحرامية ، وبعد ما رقص خد الميكروفون من المطرب وقعد يحيي ناس في الفرح ، طبعا بأسلوب ماشي مع شكله والسنجة اللي في إيده ، وبعد ما خلص ، قام باصص لعازف البيز جيتار وقال : وأسمع سيرة الحب من الأخ بتاع العود ، فالعازف تنح ويلم من الموقف ، مهني الآلة ده مبيتعزفش عليها ألحان ، يدوب بتعمل جمل مصاحبة للحن ، وهيعمل إيه قدام الراجل الغريب الشرائي ده ، فقله بصوت واطي: بس ده مش عود حضرتك ، رد الراجل بصوت عالي فيه تهديد : أسمع سيرة الحب عالعود ، رد عليه والله دا مش عود مبيتعزفش عليه ، قام الراجل بدأ يتعصب وقاله : عالية الطلاق لأسمع سيرة الحب من البتاع ده ، فبدأ العازف يقلق ، فشاورله صاحب الفرقة قله: إعمل أي حاجة عليه تتطلع صوت ، قام العازف مسك

فنانين لكن ظرفاء

الجيتار وقعد يعزف (بم بم بو بم) ، وطبعاً مفيش لحن
طالع خالص، والغريبة بقية إن الراجل قام ماسك السنجة
وقعد يرقص وعدي الموقف علي خير.

اللي يسمي خالد

كان فيه مطرب كان محبوب وسخي، فكان اللي يخلف ويسمي خالد علي اسمه ويوريله شهادة الميلاد يديله مبلغ محترم ، فكان أعضاء فرقته بيستنوا يخلفوا المولود ويسموه علي اسمه عشان يخدوا المبلغ ، فجه واحد مراته خلاص هتخلف وييدعي إنه يطلع ولد يسميه خالد ، لآكن خلف بنت ، وكان زعلان قوي فالمطرب بيقله خلفت ؟ قلّه : أيوه ، قلّه سميته إيه؟ فرد بسرعة بديهه : هية بنت بس سميتها خلود عشان خاطرك ، فأعجب المطرب بالفكرة وحصل برضه علي المبلغ منه .

شغال مع رقاصة

كان في فرقة بتشتغل مع مطرب في فندق ، ودايما بتخلص شغل الصبح وقت نزول الموظفين وطلبة المدارس لأشغالهم ، فكان واحد من الفرقة بعد ما يخلص شغل يغير يونيفرم الفرقة ويلبس بقي ويتشيك والنضارة ويركب الأوتوبيس المكيف اللي بيعدي قدام الفندق، فصاحبه يستناه بعد ما يركب ويشاور للسواق فيفتحله الباب ويقله : الراجل اللي ركب ده شغال مع رقاصة ويقول لصاحبه: المدام بتقلك متنساش الصاجات بتاعها ، وطبعاً بيكون في قمة الإحراج قدام الناس وطلبة المدارس ، وكل مرة يعمل معاه كدة ، فزميله ده جه في مرة كان متترفز جدا وعاوز يرد عليه ، واول ما إتقاله الراجل ده شغال مع رقاصة ، قله بكل ثقه وبصوت عالي قدام الركاب: الرقاصة دي تبقي ماي مائر ، فصاحبه رد عليه قله : عارفين والله ، فطبعاً بدل ما يضحك الناس علي صاحبه ضحك الركاب عليه أكثر.

المطرب الموهوب

كان في مطرب جامد قوي وكان عنده موهبة إن أي نغمة يسمعها يعرف هيه نغمت إيه ، دو ولا ري ولا صول، فمرة طلع فرح يغني ، فقال للفرقة : هغني من نغمة سي، ونغمة السي بتبقي صعبة شوية في العزف لبعض الآلات ، زي الكمانجة ، المهم الفنانين إستسهلو وقالوا: نغمة السي من نغمة الدو مفرقتش يعني ، ده فرق بسيط محدش هياخد باله ، وهتبقي أسهل في العزف ، فعزفوا من نغمة الدو ، والمطرب إبتدي يغني مجموعة من المواويل ، وفي آخر الموالم راح محول بصوته من نغمة الدو إلي نغمة السي، وقلهم بطريقة غناء: ودي بقه نغمة السي اللي أنا طلبتها بس إنتوا إستسهلتوا ، وقام نازل وطبعا كانوا بيحبوا عرق من كل حنة من الإحراج.

ما فيش أي واجب

في مهنة المزيكا ، في ناس بتشيل الآلات الموسيقية للفنانين ببسموهم النبطشية ، أو المساعدين ، أو التكنيشن ، المهم الناس دي بتاخذ أجر علي شيل الآلات ، وأحيانا الموسيقي بيديهم من عنده إكرامية ، زيادة فوق قبضهم ، فمرة نبطشي عاوز كل يوم زيادة من الموسيقيين ، فقال للموسيقي : مفيش أي واجب كده ؟ بقالك كتير معملتش معايا واجب ، فرد عليه الموسيقي وقام قايله : إن شاء الله من عنية ، وبعد إنتهاء الشغل طلب النبطشي ثاني من الموسيقي وكأنه فرض عليه وقاله : فين الواجب ؟ مفيش واجب ؟ رد عليه الموسيقي وهوة متضايق : فيه طبعاً من عنية قاله فين ؟ قاله : إكتب حرف الألف عشر مرات هوه ده واجب النهرده .

المعجبة

مره في أحد السهرات في فندق ، كان في شابة خليجية عماله تتابع واحد من فريق الكورال ، وعماله تبجلقله جامد، وهو بدأ يلاحظ ده فبدأ بيتسملها وتبتسمله ، وبعدين بدأت تجيب حاجة من شنطتها وطبقتها في إيديها ، وزميله اللي جمبه قعد يقله : ده أكيد رقم تليفونها ، إنت طاقة القدر إتفتحتلك، إنت خلاص عدت يا عم ، يا بختك شابة وخليجية كمان ، وبدأ زميلنا يرسم في خياله أحلام وردية في دقايق معدودة ، وبدأت الشابة تشاورله إنه يقرب ياخذ من إيديها الحاجة ، وهو يقلها : إستتي عشان محدش يلاحظ ، وإنتهز فرصة إن مفيش حد ومد إيده ، لقاها بتديله خمسه جنيه ، ومن إحراجه مقلش غير كلمتين : أنا لأ أنا لأ ، وزميله اللي حسده علي اللحم إنفجر من الضحك وقاله: إنت طلعت في نظرها هلفوت.

الراب

حصلت مشكلة بين إثنين فنانين في فرقة واحدة ، فصاحب الفرقة جاب طرفين المشكلة عشان يفهم إيه الموضوع ، فواحد فيهم كان لما يتترفز بيتكلم بسرعة كأنه مطرب راب باكستاني ، المهم قعد يحكي بنرفزة إيه اللي حصل ، وصاحب الفرقة عمال ساكت وببسمع ، وبعد ما خلص كلامه وشكوته ومستني بقة صاحب الفرقة يجبله حقه ، صاحب الفرقة قاله: إنت عارف أقلك علي حاجة ؟ فرد الموسيقي وقاله : إتفضل ، قاله لما بتتكلم وتحكي ببقه عايز أمشيك من الشغل خالص! ، وطبعا كل الموجودين ماتوا علي روحهم من الضحك ، وراح الموسيقي شاتم كل الفرقة بصاحب الفرقة ، وقام مروح وطبعا لما شتم شتمهم برضه بالراب الباكستاني ، وده من فضل ربنا لأن لو كان عرف صاحب الفرقة إنه ببشتمه كان مشاه من الشغل.

إيه الكبروت ده

كان في صاحب فرقة طلع قرار أي حد من الفرقة هيشرب سيجارة حشيش هيدفع ألفين جنيه ، ولو كررها يمشي من الشغل ، وكان شغال في الفرقة دي واحد قريبه شاب غلبان وعنده بعض مخارج حروف كلامه بايظة ، ومكنش بيشرب حشيش ، فعمره ما إعترض علي القرار ده ، المهم واحد من الفنانين اللي معاه في الفرقة جاب رجليه وشربه حشيش ، فعجبه الموضوع قوي وجه وقت إجتماع صاحب الفرقة بالفرقة، قام قايم وهو طبعا طابير في ملكوت الله وشارب حشيش وقله : إديني سبب واحد يخليك تمنع الحشيش من الفرقة؟ ده إيه يا اخي الكبروت ده (الجبروت) فضحك كل اللي في الإجتماع ، وطبعا صاحب الفرقة إتفاجيء من الرد وخاصة إنه قريبه ، فراح قايل للفرقة : يا جماعه من النهردة الأستاذ ده مش شغال معنا، ده جي نعطف عليه ومشغلينه معنا شفقة .

نبغي الأستاذة

بعد إنتهاء فقرة رقاصة ، جه تلاته خليجين لمدير أعمالها وقالوله : والله يا خوي نبغي الأستاذة ، قلمهم : تمام تحت أمركم فرح ولا حفلة؟ ، قالولة : حفلة خاصة، قلمهم : تمام تلاتين ألف جنيه ، رد واحد فيهم : ليش ثلاثين ألف جنيه، قلمهم : إيجار وحدة الصوت ، وأجر الفرقة ، وأجر الفنانة، قلوله : لا لا ما نبغي فرقة ، عنا شرايطنا نبغاها لحالها ، فطبعاً كل الموجودين قعدوا يضحكوا لأن كده الموضوع مش حفلة بقه ، وفي واحد من الفرقة قعد يسخره وقاله : هوه لقاك لابس قميص بيلمع إفتكرك حاجة تاني ، فراح مدير أعمالها ماسك في خناقهم وإعتدي عليهم بالضرب.

بابا بابا

كان في مطرب متمكن جدا من علم النغم والمقامات الموسيقية ، ولما كان بيقول موال بيعمل تحويلات مقامية مفيش عازف إلا وبيعجز أنه يجاربه في شطارته ، المهم كان في عزومة فنانين وحضرها موسيقيين كبار زي حسن أبو السعود وغيره ، والمطرب ده كان موجود ومفيش ولا عازف أوج عايز يشغله عشان ميحرجش نفسه قدام فطاحل المزيكا، فالمطرب قعد يدور يمين وشمال لحد ما جت عينه علي عازف أوج صغير في السن ، وقام ساحب كرسي جنبه وقعد يدردش معاه ، وطلع سيجارة عزم عليه وراح قايله : عارف والله ما حد بيمزجني غير صباeck عالورج ، كلهم عازفين علي قدمهم ، راح رادد عليه عازف الأورج وقاله : بس حضرتك بتقول كده وهنتطلع تخرجني ، رد عليه المطرب : عيب دنت إبنني حد يقسي علي إبنه ، وأفتعه يطلع يشتغل معاه ، المهم المطرب قعد يغني غنا عادي جدا لغاية ما قام الملحن حسن أبو السعود وراح قايله : لا مش ده الغنا بتاعك إحنا عايزين نسمع الغنا بتاعك اللي جيين مخصوص نستمتع بيه ، فرد المطرب قاله : معلىش بس ده عزومة فنانين مش محتاجة يعني ، راح رادد عليه

فنانين لكن ظرفاء

حسن ابو السعود وقاله : والله أبدا مينفعش، فبدأ المطرب بالغنا اللي بيدوخ العازفين وقعد يلف علي النغمات والمقامات ، إن عازف الأورج يرد ولا يقول نغمة مفيش ، وشال إيده تماما من علي الأورج ، وراح منادي عليه وقله : بابا بابا أديك قسيت علية كفاية بقه ، رد عليه المطرب قاله: سامحني بيني همه اللي طلبوا.

المطربة الكفيفة

من المعروف إن أغلب المكفوفين يمتازوا بخفة الدم ،
فمرة كان فيه مطربة كفيفة ودمها زي العسل وذهنها
حاضر ، فكانت قعدة علي كرسي مستتية فقرتها وتتطلع
تغني ، وسمعت واحد بينده علي موسيقي صاحبه إسمه
كبدة ، وهية متعرفهمش اصلا ، فراحت قايلالة : كبدة
إبريل ، وقامت مغنياله : كبدة إنت كبدة لآكن أحي كبدة
علي وزن أغنية كدبة إنت كدبة .

عازمين أرنب

كانت الفرقة الموسيقية منتظرة عرض فقرتها الموسيقية، وكان مكان إنتظار الفرقة جمب باب المطبخ الللي بيخرج منه السفرجية ويروحوا يدخلوه للزباين ، فكان في واحد من الفنانين واقف ، وشايف المتر عمال ينده علي السفرجية : فين حاجات تربييزة خمسة ؟ فييجي سفرجي يشيل صنية عليها جزر متقطع في كوبايات، وبعدين يخرج المتر ثاني ينده : يا جماعة باقي طلبات ترابييزة خمسة فين ؟ ، فيخرج سفرجي شايل إطباق خس ، وحصل الموضوع ده أكثر من مرة ، راح داخل الموسيقي علي السفرجي وقله: هوه في أرنب سهران جوة علي تربييزة خمسة ؟ فضحك السفرجي قوي ووقعت الأطباق منه من كتر الضحك.

أحمد ملوخية

كان في شاعر جميل جدا اسمه أحمد ملوخية ، كتب أغاني كثير لفنانين كبار ، زي عبد الغنى السيد أغنية أنا وحدى يا ليل سهران ألحان الموسيقار محمد عبد الوهاب، وعمل لفايد محمد فايد ، وكتب لمحمد قنديل أغنية إن جتنا يا جميل ، وحاجات كثير جدا لفنانين تانيين ، وكان معتزا بإسمه جدا ، وشايف إن الموهبة في الكتابة ، أهم من إسم الشهرة وإن العمل الحلو بيفرض نفسه ، فحب مرة يعرض علي الفنانة أم كلثوم حاجة من أعماله، وفعلا عرض عليها أغنية من كلماته عجبته جدا ، وقالته : الأغنية جميلة جدا ، بس معلى مينفعش أم كلثوم في الحفلات تتطلع تقول: الأغنية دي كتبها شاعر إسمه أحمد ملوخية ، فلازم تغير الإسم وفكر فى إسم تانى وأنا هاخذ الأغنية، خرج شاعرنا وهوة مش مقتنع طبعا بالكلام ده ، وعدي إسبوع وراح مقابلها ، وقالت له: ها إخترت إسم شهرة تانى غير أحمد ملوخية؟ فقلها : أيوة قالته إيه هوه ؟ فقلها : محمد ملوخية ، وطبعا مخدتش أم كلثوم الأغنية وهوه مهتمش بس كانعايز ياخذ حقه .

جنات تجري من تحتها الأنهار

كان في إثنين من المداحين المكفوفين هيجوا حفلة في قرية من القري ، ومن عادات أهل القري والأفراح الشعبية إنهم بيعزموا الفنانين عشان ياكلوا ، قبل الحفلة بقة أو بعدها، المهم لازم ياكلوا ، فدخلت الفرقة ومعاهم الإثنين المداحين وإتحط الأكل ، وكانت الوجبة رز وفتة ، فواحد من المداحين كل تلت معالق وملقاش لحمة ، فعاز يسأل صاحبة إذا كان الأكل قريحي مفيهوش لحمة ولا إيه ؟ ، بس سأله بطريقة محدش يلاحظها فقالها : كأنها أعجاز نخل خاوية ، قام رادد عليه صاحبه المداح الثاني بنفس الطريقة وقالة : جنات تجري من تحتها الأنهار يعني اللحمة تحت الرز .

عندي فرقة

كان في واحد من فريق الكورال شغال في فرقة، وكان أسلوبه في التعامل مع زمائله بعصبية وغرور، ودايما أي حد يعدل عليه في الشغل، يقوله : أنا كنت مطرب وعندي فرقة كبيرة... وأنا.. وأنا.. وأنا، فجه مرة كان عامل مشكلة مع حد من زمائلة في الكورال كالعادة، وطبعاً رده الطبيعي اللي مبيتغيرش دنا كنت مطرب وعندي، قام رادد عليه زميله اللي بيتخانق معاه وقطع كلامه وقاله : عارفين والله كنت مطرب في فرقة (الفور دوجز)، وكنت هتعمل شريط كاسيت مع شركة دونكي فون للإنتاج الفني، وطبعاً ضحك كل الفرقة عليه وخلاه واقف مذهول من الرد الغير متوقع.

نشاذ

كان فيه واحد من فريق كورال شغال في فرقة ، وكان مستواه الفني ضعيف جدا، فكان دائما بينشذ في الغناء، يعني لو الأغنية بتتقال من نغمة الصول هوه يغني من نغمة الفا ، المهم بيبقي فارق عن الموسيقى وعن زمائله، وده طبعا بيبقي عامل نشاذ في الصوت كله ، والغريبة إن برغم مستواه الضعيف ده ، كان مقتنع بنفسه قوي، ومش بس كدة ، ده كان كمان بيعمل شريط كاسيت خاص بيه ، فجه في يوم كان فارق كالعادة بس زيادة حبتين كأنه عامل عرض في عيد ميلاد كارفور، فجاله زميله بيلقح عليه وقاله : طبعا الشريط بتاعك اللي إنت بتعمله فيه أغنيات : لا يافراق – فرق كبير – فراق بفراق – فارق بالمعروف .

العازف المرتبک

كان فيه واحد من عازفين الإيقاع يعتبر من أهم العناصر في الفرقة ، مشي وساب الشغل فأسندوا لواحد تاني مسئولية الإيقاع بعده ، وبالرغم من إنه شاطر ومتمكن بس كان مرتبک جدا ، لأنه جي بعد واحد مهم ، والإيقاع ده يعني الزمن والسرعة والتيمبو ودخول الأغنيات ، فكل ما يدخل أغنية من شدة الإرتبک تبوظ ، فجه مرة واحد من الفرقة بعد الشغل قاله: ألف ألف مبروك النهردة إنت خدت جايزة ! ، رد عليه المرتبک : بس أنا عكيت الدنيا جايزة إيه دي ؟ قاله: جايزة الحمار الذهبي، فضحكت كل الفرقة حتي المرتبک ، ومن ساعتها مبقاش يرتبک عشان ميخدش الجايزة تاني ، والأجمل إن الجايزة الشرفية دي بقت ثابتة كل يوم كنوع من الضحك ، وكل يوم الفرقة تديها لأكثر واحد غلط في الشغل.

صورتني في الجرايد

كان في واحد من العازفين الشاطرين قوي علي آلة الكمانجة، وسافر كثير لمعظم دول العالم، وكان بيمتاز بخفة الدم والتريقة علي صاحبه في الشغل، فمرة حبوا يحطوا إيديهم في إيدين بعض ويتحدوا ويعملوا عليه حفلة ، فبدأوا يتريقوا عليه وهوة يرد وبيحارب في اكثر من فارس ، بس الكثرة تغلب الشجاعة ، راح منادي واحد صاحبه معاه في الفرقة يستتجد بيه وقاله : قلمهم أنا مين؟ وسافرت فين ؟ قلمهم : أنا صوري نزلت في الجرايد في أمريكا ووريتها لك ، وطبعاً صاحبه اللي إستتجد بيه ده كان متفق برضه معاهم ، وراح قايلهم : فعلاً يا جماعة الراجل ده نزلت صورته في الجرايد في أمريكا ، فالعازف بدأ يحس بلذة الإنتصار والإنصاف ، وكمل صاحبه الكلام : ونزلت صورته ومكتوب تحتها ، القبض علي عازف مصري يتحرش بالفتيات ، ويتسول ، فضحكت كل الفرقة والعازف كان في قمة الغضب وأخيراً داق من نفس كاس التريقة عالناس .

هذا هو

في مكان من الأماكن الشيك كانت الفرقة شغالة في أمان الله ، وكان في ثلاثة عرب قاعدين باصين علي واحد من الفرقة ومركزين معاه قوي ، تقريبا شبه حد صاحبهم وبدأوا يتكلموا مع بعض بصوت عالي ملفت وهمه باصين عليه ، فواحد يقلهم : هذا هوه والتاني يقله : لا لا يشبهله ، والتالت يرد: والله هوه بالظبط ، فبدأت الفرقة تركز معاهم ، وصاحبنا اللي بيبصوله ده مش فاهم همه عايزين إيه ؟ وخاصة هوه من النوع الخواف جدا ، فبيسأل صاحبه هوه في إيه ؟ صاحبه عايز يخوفه قاله: عمالين يقولوا هذا هوه اللي سرقنا العام الماضي وأخذ الباسبورتات، فبدأ صاحبنا يقلق وكان عايز ينزل من علي المسرح والفرقة كلها ميتة من الضحك علي منظره وهو خايف .

معاه ناس

موسيقي إنضم لفرقة جديدة ، فواحد من الموسيقيين القدام إتبرع وعايز يعرفه علي كل واحد من الفرقة بأنه يحكيه نبذه عنه بطريقة كوميدية وفيها مبالغة ، راح جه عند واحد من الفرقة وقال عليه: ده بقه معاه ناس، فالموسيقي الجديد قام قايله: يعني إيه معاه ناس؟ قاله: يعني معاه عفاريت وبيعمل حاجات غريبة وهو شغال، فطبعا صاحبنا الجديد بدأ يركز معاه يشوف بقه معاه ناس إزاي ، ومفيش ساعتين واحد في الفرقة طلب سيجارة من اللي مفترض معاه ناس، فرد عليه وقاله: معلش مش هينفع ، وبدأ يشارك الموسيقي الجديد معاه في الموضوع وقاله: أنا كل يوم أجيب أربع علب سجاير وبتخلص في الشغل ، فالموسيقي الجديد قاله : كتير قوي أربع علب علي صحتك ، راح رادد عليه قاله : هوه إنت فاكر يشربهم لوحدي (يقصد بيفرقهم علي الفرقة) ، راح داخل في الكلام صاحبنا اللي كان بيعرفه عالفرقة قلّه ها: صدقت بقه إن معاه ناس وبيشربوا معاه سجاير كمان.

الجديان

عازف في فرقة قعد يتكلم علي زميله قدام الفرقة وبيقلمه: ده معاه فلوس قد كده ، وبخيل ومعاه ملايين ومبيصرفش خالص ، أنا كنت شغال معاه زمان وعارف بيكسب كام في اليوم ، وزميله فضل ساكت لحد ما فاض بيه وراح قايل للفرقة : أنا عاوز آخذ رأيكم في حاجة ؟ قالوله إتفضل ، قال: لما واحد يبقي عنده إثنين جديان ، وقبل ما يكمل راح صاحبه حس بانتفاضة هتحصل وقام قاطع كلامه وقال : بيني قاتلك إتسدوا وخدوا عين وماتوا ، فبدأت الفرقة تنتبه للموضوع أكثر ، وقاموا قايلنله: سيبه يكمل ، فطبعاً إستسلم الموسيقي الساخر ورضي بالأمر الواقع ، وصاحبه كمل كلامه : لما يبقي واحد مربى إثنين جديان ، واحد فيهم ينتحر وينط من فوق سور السطح ، والثاني ياكل سلك كهربا ويموت ، يبقي اللي مربيهام عامل فيهم إيه ؟ قالوله : وهمه ميتين من الضحك يبقي صاحبهم راجل مجموعهم وبخيل بخل موردهش علي حد، قلمه: الأستاذ اللي بيتهمني بالبخل هو ده صاحب الجديان ، وطبعاً كمية ضحك محصلتش علي القصة وعلي شكل زميلهم .

غني من بقك

مره كان في مطرب جي الشغل تعبان ومش قادر يمشي، فشافه المسئول عن الفرقة ، وكان راجل بيمتاز بخفة دم وسرعة بديهه في الرد فقال للمطرب : مالك في إيه ؟ رد المطرب قاله : تعبان قوي ، عندي البواسير ومش قادر أمشي ولا أتحرك، ومش عارف هطلع الفقرة بتاعتي وأغني إزاي؟ ، فقام رادد عليه صاحب الفرقة وقاله : ألف سلامة عليك ، خلاص غني النهاردة من بقك بقه .

إرجع يا كحلاوي

كان فيه مطرب مغمور دايمًا بيحب يتفزلك وهوه بيغني، ومسمي نفسه الكحلاوي نسبة للمطرب الكبير محمد الكحلاوي، وكان دايمًا بيستعرض قدام العازفين بإمكانيات صوته، فكان شغال معاه عازف أكورديون في فرح بلدي في الشارع، ومتعاط من تناكته قوي، وبدأ النجم بالغناء وقعد يخرج من مقام موسيقي يروح لمقام ثاني، المهم إتفزلك علي الآخر ومش عارف يرجع، بس مش مبين قدام الناس، راح قايم عازف الأكورديون في وسط الفرحة وهو معلق الأكورديون وقاله بصوت عالي: إرجع يا كحلاوي، إرجع يا كحلاوي، السكة أهني ويعزفله علي الأكورديون وفضحه في الفرحة كله.

الزبون العجيب

كانت في مرة فرقة مطرب شغالة عالمسرح في مكان فخم مخصص لسهرات يومية ، وفجأة طلع واحد شكله محترم ولابس شيك ، ومرة واحدة طلع المسرح وراح لواحد من فريق الكورال ووشوشه في ودنه وقله حاجة خلاة يضحك جامد والزبون في قمة الجد، قام الموسيقي شاورله علي المطرب ، مهتمش الزبون بكلامه وراح داخل علي واحد تاني من فريق الكورال وقله حاجه في ودنه برضه ، مات علي روحه من الضحك والراجل الزبون عمال يقله يلا قول يلا ، وزى ما صاحبه عمل هوه كمان عمل ، وقله المطرب أهو ، قام الزبون آخر ما زهق دخل عالمطرب وقله في ودنه حاجة المطرب برضه قعد يضحك ، ويقله: لا العفو مقدرش، والزبون مصمم ويقله: قول هديك فلوس ، وراح مطلع دولارات من جيبه يديها للمطرب ، ويلح عليه ، ويقله: قول يلا قول ، وكل الفرقة والزباين الفضول خدهم وعايزين يعرفوا الراجل ده عايز إيه؟ ، قام المطرب في الآخر الراجل قعد يرمي فلوس ويقله : تاني والزباين كلها ميتة من الضحك ، وكل ما يعيدها ويقله تحية للخروف

فنانين لكن ظرفاء

يطلع فلوس يديله ، وبقي يلف علي واحد واحد في الفرقة
يقله : أنا خروف أنا خروف ، واللي يقله تحية للخروف ،
أو أحلي خروف يديله فلوس ، ولغاية دلوقتي محدش
عارف سر الإسم ده إيه ، وهو له كان مبسوط وفخور
بيه .

عامل مثقف

كان في واحد من عازفين الإيقاع مخدش حظه من التعليم ، بس مصمم يحط في كلامه كلمات باللغة العربية الفصحى يعمل لنفسه بيها بريستييج ويبين إنه مثقف، وبالرغم من المواقف اللي بيتعرض ليها كان مصمم برضه يعمل مثقف ، يعني مثلا ، كان في ناس بتتكلم إن الملك حسين ملك الأردن في حالة خطيرة وشبه مات ، قام داخل في الحوار وقايل : أه الدكاترة بتقول إنه مات تكتيكيا (إكلينيكيًا يعني) ، فجه في مرة بقة صاحبنا ده كان شغال في فرقة لسه ميعرفهوش قوي، ومفيش فيها غير إثنين بس اللي عارفينه من زمان ، وكانت الفرقة عندها راحة وقعدين عالقهوة ، فصاحبنا اللي عامل مثقف لقي واحد من الفرقة قاعد بينام وهو قاعد علي الكرسي فراح قايله : إيه يا صاحبي إنت بتحتضن ولا إيه؟ ، فرد واحد من صحاب المثقف القدام وقله قدام الفرقة : إسمها بتحتضن يا جاهل ، إسمها بتحتضر ، فضحكت الفرقة كلها ، فراح صاحبنا مدعي الثقافة إتحرج وإتترفز قوي وقام من مكانه وبصوت عالي مزعق في صاحبه وقله: إنت عايز تعملني نسخة قدام الناس وتضحكهم عليا ، فضحك الفرقة اكتر عليه وبرغم موافقه دي ميبطلش فزلكة.

الشغل شغل

كان في مطرب مرة بيغني في مكان والناس طلعت ترقص وهوه بيغني ، ومرة واحدة طلعت واحدة بترقص ، وف نفس الوقت وهية بترقص عمالة تتكلم جمبه ، وهوه يغني حنة ويسيب الميكروفون ويوجهها كلام بس راسم إبتسامة مصطنعة ، المهم واحد من الفرقة بدأ يركز معاهم لقاها بتقله : هطلع عينك وهبهلك ، هاتوا أشوفه وهوه يرد : لما تشوفي حلمة ودنك واللي عندك إعملية ، وهية تقله : أقسم بالله لأديك باللي في رجلي وتشاور علي الجزمة ، وهوه يقلها: دنا هفضحك وهرحلك من هنا ، وطبعاً كل ده والمطرب يتكلم ويشتم ، ويغني والإبتسامة المصطنعة مبتقارقهوش ، وهية برضه ترقص وتتكلم ، يعني لا يمكن لأي حد يلاحظ أي حاجة ولا أي مشاكل، وخاصة صوت السماعات عالي ، يعني لازم يكون حد مركز قوي ويعرف يقري لغة الشفافيف زي صاحبنا الأروبة ده ، وبعد تركيز وتدقيق من صاحبنا، عرف الحوار كله وحكاه للفرقة ، وإن المطرب إتجوز سورية وعامل مشاكل معاهما وشبه منفصلين ، وواخد الولد ومش عايز يدوهولها ، وهيرحلها من مصر ، وجاب تاريخ قصة حبهم من البداية ، بس اللي لفت نظر الفرقة كلها ، الثبات بتاع المطرب وهوه بيتخايق وبيغني عادي جدا من غير ما حد يلاحظ ، أه أصل الشغل شغل برضه حتي في حل المشاكل الزوجية.

ليبيا

كان في مرة مطرب بيغني في مكان وكان سهران زباين من ليبيا ، وواضح إنهم كانوا زباين تقال وإيديهم سخية ، وكانوا لما بيرقصوا بيعملوا كلهم بإيديهم الإثنين علامة النصر مع أي أغنية ، وطبعاً مش في دماغ المطرب ولا مدير أعماله ، ولا الفرقة غير إن الزباين تعجب بيهم وينوبهم من الخير أكبر نصيب ، ولا تقولي بقي بيعملوا علامة نصر ولا حتي يتشقلبوا علي دماغهم ، المهم مدير أعمال المطرب نده عليه وطلب منه يغني أغنية بيحبها الليبيين جداً إسمها (جماهيرية سلطة شعبية ومعمر هوه أمير القومية)، وقعد يلح عليه جامد ، ويقله هتجيب فلوس كتير وهيتبسطوا ، وكان مدير أعمال المطرب ده مسيطر علي دماغه ، والمطرب بيسمع كلامه بدون تفكير ، وقام عطلول مغني الأغنية ، وأول ما قال ومعمر أمير القومية ، ومستتي بقه الخير كله زي ما رسمهوله مدير أعماله ، لقينا فجأة دوشة مش طبيعية في المكان، والزباين عابزة تمشي وتزعق وتتخانق ، وبدأوا يشاوروا لصاحب المكان بيجي ويسكت المطرب ، وجه صاحب المكان قعدوا يكلموه ، راح طالع صاحب المكان مشاور للمطرب يققل وقله بصوت عالي: إنت حمار مبتفهمش بتغني لمعمر رئيس ليبيا ، والمطرب يقله: وفيها إيه طيب؟ قام قابله : إنت مش شايف بيعملوا علامة النصر؟

فنانين لكن ظرفاء

ودي إشارة الثوار المعارضين لمعمر ، وعاملين الثورة
إمشي إطلع برة ، ويبص المطرب علي مدير اعماله لقاه
فص ملح وداب وخذ التهزيق كله لوحده عشان ساب
دماغه لمدير أعماله .

فرح بالإكراه

كان في مطرب من مشاهير فترة التسعينات بيجامل كثير قوي أكثر ما بيشتغل ، ويغني في أفراح وأعياد ميلاد الناس الثقيلة ، يعني ممثلين مشهورين ، منتجين ، لوائيات شرطة وجيش ، والموضوع ده بدأ يضايق الفرقة ويتعبهم جدا ، مهو طبعاً عشان واحد ينزل ويتشيك ويروح شغل ويشتغل وميخدش فلوس عشان اليه الفنان عايز يجامل ، وقرروا يتكلموا معاه ويقولوه: حضرتك عاوز تجامل جامل وهمه هيجاملوك في حاجات ، لآكن إنا مالنا؟ معرفش الناس دي ولا هيبجوا يجاملونا ، ووعدهم المطرب إن هيبقي يقلل من المجاملات دي ، وهيحاول يجيب للناس قبض وهو هيجامل في أجره ، ومفيش بعدها بأسبوع إتصل بيهم وقلهم : عندنا فرح والمكان في القاهرة ، ويدوب ساعة زمن ومش مجاملة ، وبالفعل جت الفرقة وركبت الباص بتاع الشغل ، وبدا الأوتوبيس يتحرك ، وفجأة طلع شوية بودي جارادات وقفوا عند باب النزول وقالولهم : محدش يتحرك من مكانه إنا مسافرين السويس فرح مجاملة واللي هيفكر ينزل هيزعل .

نصب

مرة كان في فرقة صغيرة ومعاهم إثنين مطربين، كانوا شغالين في فرح في فندق ، وبعد ما خلصوا الفرحة جت واحدة شابة وقلتلهم : برافو عليكم جدا ، أنا معجبة بيكم قوي وعلازكم في فرح واللي إنتوا عايزينه تحت أمركم ، قالوها عنيما فين المكان ؟ قالتلهم : فرح في الشارع في منطقة شعبية ، قالوها بس إحنا مبنشتغلش في الشارع ، قالتلهم : هديكوا اللي إنتوا عايزينه ، فإضطروا يروحوا ، وهمة شغالين طلعت ست كبيرة ترقص عالمسرح وراحت ماسكة المايكروفون وقعدت تتكلم : أنا بحبي فلان إبني ربنا يفك سجنه ، وبحبي فلان إبني ربنا يخرجه بالسلامة ، وبدأوا ينتبهولها ومش فاهمين إيه اللي بيحصل ! ، المهم خلصوا فقرتهم وراحوا للشابة اللي إتفقت معاهم ياخدوا فلوسهم قالتلهم : روحوا للعريس هوه هيجاسبكم ، وفعلا راحوله قلهم : متشكرين جدا علي المجاملة دي قالوله : العفو بس بالنسبة للفلوس بقية، قلهم فلوس؟ عايزين فلوس؟ شايفين الست اللي كانت عالمسرح دي ؟ ، قالوله أيوة قلهم دي أمي ، أكبر تاجرة مخدرات في المنطقة ، روحوا قلولها : عايزين فلوس وبدأ يظهر شوية أشكال من البشر غريبة الملامح والكلام ، ويحاوطوا الفرقة ، فطبعاً الفرقة عرفت إن كدة خلاص بداية النهاية قالوله : لا وعلي إيه إحنا بنهزر فلوس إيه ألف مبروك وربنا يتمم بخير.

وجهة نظر

مرة كان في فرقة شغالة في حفلة من الحفلات ، وطلع واحد من الحاضرين وفضل يوزع فلوس عليهم ، وكان من ضمن الفرقة دي فريق الكورال ، وكان مكون من ثلاثه ، فالراجل وهو بيفرق فلوس ، فرق علي إثنين ومخدش باله من الثالث ، وبعد ما الفرقة خلصت فقرتها وقاعدين عالقهوة ، جه مدير الفرقة يهزر مع اللي مخدش فلوس وقام قايله : بس تصدق الزبون ده شكله بيفهم في الأصوات الحلوة، إذا زمايلك ونت مدكش ، فطبعاً زمايله اللي خدوا فلوس قعدوا يضحكوا قوي ، وطبعاً كان متضايق من ضحكهم عليه اللي فيه شماته ، فرد عليه مطرب الكورال بسرعة بديهة وقاله : مش حكاية بيفهم في الأصوات ، حكاية إنه ليه نظرة في الشحات المحتاج وبين ابن الناس .

المطرب المعتمد

من المعروف إن أي حد بيغني أغنية بيبقي بيغنيها علي حسب طبقة صوته ، يعني مطرب يغني أغنية من نغمة الصول ، ونفس الأغنية هية هية مطرب تاني يغنيها من نغمة لا ، وأي مطرب عايز يغني أغنية علي أي فرقة ، عازف الأورج يسأله هتغنيها منين؟ ، يقلهم بقه : صول ، لا ، دو ، فكان فيه فرقة موسيقية بتشتغل في فرح في قاعة جوه نادي ، وبين الإستراحة لقت الفرقة واحد لابس بدلة وإيده في جيبه وداخل عليهم وقلهم: مساء الخير أنا فلان الفلاني ، زميلكم ومطرب معتمد في الإذاعة والتليفزيون ، وعضو نقابة المهن الموسيقية وقريب العريس ، وكنت عاوز أغني أغنية ، فرد عليه عازف الأورج قاله : تحت أمرك أهلا وسهلا هتغني إيه ؟ ، فرد المطرب : أغنية سواح ، فرد عليه عازف الأورج : تمام منين؟ قاله : أنا من الطالبية ، فرد عليه عازف الأورج لأ منين ، رد عليه المطرب تاني : منا قلت لحضرتك من الطالبية ، عند بتاع القصب اللي في شارع مش عارف إيه ، فبدأت الفرقة تكتم ضحكها ، بس قالوا أكيد مفهمش السؤال ، فسأله تاني عازف الأورج : لا يا نجم أقصد

فنانين لكن ظرفاء

الأغنية هتقولها منين ؟ فضحك المطرب قوي وقاله : آه
معلش فهمت غلط، وطبعا الفرقة إتأكدت إن فعلا فهم
غلط ، ده برضه فنان ومعتمد ، وراح عازف الأورج
مكمل كلامه وقاله: ولا يهكم خالص هتقولها منين بقه ؟
رد المطرب : هقلها من أولها ، فإنفجرت الفرقة من
الضحك وعرفوا إن الفنان ده مش مطرب معتمد ده بطيخ
معتمد .

الناموسة

كان في فرح شعبي في الشارع في قرية من قري الفلاحين ، وكان في وسط المسرح في السقف متعلق كشاف كبير جدا ينور المسرح ، وكان الكشاف ده لامم حوالية قبايل وجيوش من الناموس والهاموش ، فطلع مطرب يغني ، وبعد أغنيتين كدة طلبوا منه المعازيم يغني موال ، وفعلا المطرب بدأ في الموال ، وجه عند جزء بيعلي بصوته فيه ، ولجل حظة المنيل كان الحنة دي في كلمة كلمة الأيام ، وبيمد في حرف المد (حرف الألف) وفاتح بقه ، وقامت داخلة ناموسة علي البلعوم علطول، وشرق وساب الميكروفون وقعد عالمسرح يعمل حرف الحاء ورا بعض عشان تخرج ، بس طبعاً تخرج فين دي ما صدقت لقت بيتها الجديد في بق المطرب ، وكل المعازيم بالفرقة ماتت من الضحك علي الموقف ، ونزل من علي المسرح مكملش فقرته عشان خاطر ناموسة هانم .

بيغنوا برة

كان في مطرب عنده فرقة موسيقية كبيرة ، وكان من ضمن فرقة فريق كورال مكون من تلاته ، إثنين هاديين وواحد لسانه متبري منه ، فكان في أغنية خليجية إيقاعها صعب في الغنا ، فكل ما المطرب يغنيها والكورال يرد المطرب يقلهم : مش كدة خالص ، إنتوا كدة بتغنوا برة الإيقاع ، مش ظابطين الغنا مع الإيقاع خالص ، فيتمرنوا عليها ويسمعوها وييجوا يغنوها ثاني يوم ، برضه يقلهم نفس الكلام : إنتوا بتغنوا برة ، لحد ما إتخنق منه أبو لسانين ده ، فجه في مرة بيغنوا نفس الأغنية الملعونة دي، وطبعاً كالعادة المطرب قلهم : يا جماعة والله إنتوا بتغنوا برة، فرد عليه أبو لسانين: أيوة فعلاً بنغني برة ، رد المطرب : يعني إنتوا عارفين أهو ، بتغنوا برة ليه بقة؟ قام قايله : أصل هنا الدنيا حر قلنا نشم هوا برة ونبقي نيجي ثاني .

صدمة ملحن

واحد من الملحنين اللي كانوا بيبيتدوا حياتهم الفنية ومستنيين فرصة عشا يشتهروا ، وبرغم موهبته كان دائما بتحصله مواقف غريبة كان أغربها ، في مطرب سوري بيختار كام أغنية من أكثر من ملحن ، فراح الملحن ده عشان يسمعه مجموعة ألحان ، فكل ما يسمعه أغنية المطرب يقوله : الله الله إسمها إيه دي ؟ يقوله الملحن : إسمها كذا ، فالمطرب يقوم كاتب إسمها في ورقة ، لغاية لما إختار أكثر من أربع أغاني وقالة : أستاذي تشرفت بمعرفتك حضرتك ألحانك فيها رقي وتقدم ، أنا إخترت المجموعة دي وهسافر أكلم شركة الإنتاج وإن شاء الله آجي بعد كام شهر عملي تنازلات وأعطيك المصاري ، وفعلا سافر المطرب ، وبعد ست شهور رجع وراح مكرم الملحن في التليفون ، قاله :كيفك أستاذي أنا موجود بمصر وبدي أشوفك ، وطبعا صاحبنا الملحن فرح جدا ، قال بقه كدة هيجاسبني علي الأغاني والدنيا هتزهزه معايا ، ومستناش كثير ركب مواصلات وقام رايحله جري ، وبيخبط لقي واحد شبه المطرب بيفتحله ودقنه واصلة لحد بطنه ، وقبل ما يسأله إنت أخو المطرب ولا إنت مين ؟ لقي ترحيب من الراجل الملتحي وقاله : أهلين أستاذي كيفك ؟ والله إليك وحشة ، فعرف الملحن إن ده المطرب، المهم سلم عليه ، وجابله المطرب واجب

فنانين لكن ظرفاء

الضيافة ، وراح الملحن سأله وقاله : هوه حضرتك مربى
دقنك ليه ؟ رد المطرب : والله أستاذى أنا إعتزلت الفن
وربنا هدانى بس حببت أشوفك وأسلم عليك لأنك
واحشنى ، فطبعاً كانت صدمة العمر بالنسبة للملحن اللي
طارت أحلامه فى الهوا وقاله : هوه أنا سمعتك ألحان
دينية؟ ولا ألحانى صحت فىك النزعة الدينية ولا إيه؟،
إنت جى تستشيخ على حظى أنا ، وطبعاً المطرب إنفجر
من الضحك ، والملحن مشى محطم نفسياً يستنى فرصة
تانية تجيله .

مطلوب دف

عازف دف جاله إتصال علي التليفون من واحد موسيقي زميله عامل فيه مقلب، أول ما رد عليه قاله : مساء الخير حضرتك الأستاذ فلان عازف الدف؟ فرد عليه وقاله: أيوة مين معايا؟ قاله: حضرتك متعرفنيش بس أنا سمعت عنك إن حضرتك من العازفين الشطار ، وكنت عاوز حضرتك في شغل مهم ، رد قاله : أهلا وسهلا حضرتك عاوز فرقة يعني؟ ولا عاوزني أشغل مع فرقة ؟، رد عليه قاله: لا لوحدك بس حضرتك مطلوب بالإسم، دي شغلانة مش أي حد يشتغلها ، رد عليه عازف الدف قاله : أو مرني فين؟ ومع مين؟ ، قاله: كنا حضرتك شاربين غسالة وعايزين نهیصلها في الشارع ونلف حواليتها ونت معانا بالدف .

مطرب يطفش

كان في مطرب بيشتغل في مكان بيبقي هو فيه آخر فقرة مفيش بعديه حد ، المهم كل ما المطرب ده يقدموه ويبتدي أول أغنيه ، الناس تبتدي تقوم واحد ورا الثاني ، علي ثالث أغنية كده بيكون المكان بيبرق مفيهوش غيره هوو والفرقة والسفرجية ، وطبعا بيبقي موقف محرج ليه ، فمرة بعد اما حصل الموضوع ده ، وقفوا كام واحد من الفرقة برة بيتكلموا ، وعمالين يحكوا لبعض إنها مش أول مرة تحصل ، ومين ملاحظ الموضوع ده؟ ، فرد واحد من الفرقة قال: والله لو المطرب دا لو داخل في إيده قنفد ريحته معفنة الناس مش هتجري بالطريقة دي أبدا.

أكل العيش

فرقة كانت شغالة في فندق مع مطرب ، ومفروض إن
الفقرة بتاعتهم بتكون مدتها ساعة ، فعدت ساعة والتانية
والتالثة كمان ، والمطرب متسلطن قوي والناس كتير
عمالة تتطلب منه أغاني، وطبعا الفرقة تعبت وحست
بملل ، فواحد من الفرقة قعد يهمل وهمه شغالين ويقول:
ده إيه القرف ده ، دا حاجة زفت والله ، حرام دول عالم
مفترية، إحنا إيه شغالين مع كفره ،همه إشترونا ، أنا
هنزل وهروح ومش عايز أشتغل تاني مع الناس دي ،
حرام والللة اللي بيحصل دا ، وعند الكلمة دي الأغنية
خلصت فظهر صوته قوي وعالي ، فبصلة المطرب جامد
حتة بصة وقاله : بتقول إيه؟ حرام إيه ؟ ، راح رادد عليه
عاطول قاله : حرام عليك صحتك وصوتك يا نجم
هنتعب ، كدة كتير عليك ، فطبعا كان شكله بايخ قوي
قدام زمايله اللي عمل قدامهم سبع السباع ، بس أكل
العيش يقه.

ناقر ونقيب

كان في إثنين موسيقيين في فرقة واحدة ، واحد من فريق الكورال والثاني عازف قانون ، دائما يناقروا في بعض بس بقفشات كوميدية ، كنوع من الهزار ، فمرة اللي كان من فريق الكورال بيقول قرار مع المطرب (يعني بيغني اللحن من طبقة صوتية منخفضة) ، فراح عازف القانون قاله : صحة وعافية ، أجبلك فوار؟ ولا سفن؟، مش ده إنتفاخ برضه؟ ولا عندك حموضة؟ والفرقة كلها قعدت تضحك ، بعدها بشوية كان في تقسيمة لعازف القانون وقعد يعزف عزف منفرد ، وبعد أما خلص راح مطرب الكورال قايله : إنت عاوز تقول إيه بالتقسيمة دي؟ إيه وجهة نظرك يعني بعد الرغي دا كله؟ محدش فاهم حاجة من اللي عزفتة ، إطبع ورق للناس وقلهم : مرفق مع التقسيمة كتالوج الشرح ، أو نزل الترجمة علي صدرك .

زيارة قنفذ

فرقة موسيقية كانت قعدة علي القهوة ، وكل إثنين ماسكين ودان بعض بيتكلموا في موضوع ، فواحد من ضمن الفرقة كان مؤمن قوي بالجن والعفاريت ، وعمال بيتكلم مع زميله بجد مش بهزار ويقله: إنت تعرف إن القنفذ ليه علاقة بالجن؟ ولما مراته بتولد بتحفر نفق تحت الأرض وتروح تحيب خشبة صغيرة زي فرع شجرة بيقولوا بتاعة جن ، لو حطيتها في المية الخشبة دي تنقسم إثنين وتعم كأنها سمكة ، وبعدين لو حطيتها في جيبك الرزق والخير كله يجيلك ، دنا نفسي أشترى قنفذ بس مش عارف الأقيه فين ، المهم زميله اللي كان بيسمعه بعد إسبوعين نزل سوق الجمعة يشتري عصافير، ويعمل شوبينج حيوانات ، وفجأة بص لقي قنفذ الراجل حطه في جردل مية وعمال يعوم ، فإفكر كل كلام زميله عن الخير بتاع القنفذ ، وفرح كأنه لقي مغارة علي بابا ، وراح مكرم زميله بالتليفون وقاله : انا لقيت القنفذ هنا في السوق أجهولك فصاحبه رد عليه قاله : بس لازم تكون قنفذة مش قنفذ ، قاله : ثواني خليك معايا وراح سأل الراجل صاحب القنفذ : لو سمحت ده دكر ولا نتاية؟ قاله عندي الإثنين ، وفرح جدا وقاله : هجهولك معايا الشغل النهردة ، وفعلا إشتراه وبدأت رحلة القنفذ مع أهل الفن ، مبدأياً صاحبنا نازل من بيته بالقنفذ ليه في شنطة هدايا

فنانين لكن ظرفاء

مخرمة عشان يعرف يتنفس ، وأول ما وصل الشغل بدأت الفرقة تسأل إيه ده، وكل ما يقول لحد ده قنفد يموت من الضحك، طبعا ما همة جهلة مش عارفين سر القنفد اللي مخبيه، وكل واحد معدي يفتح في الشنطة ويتفرج عليه ، المهم أول ما جه زميله اللي عايز القنفد قاله : إتفضل يا سيدي القنفد أهو ، قلّه : إيه ده إنت إشتريته النهردة ليه ؟ أنا كنت بقلك إسأل بس، فبدأت علامات الغضب تبان علي وش زميله اللي كلف نفسه وشال القنفد في رحلة طويلة ، دا غير إنه كان هيبقي السبب في طلاقة لإن مراته بتخاف من الحيوانات وقاله : مش أنا كلمتك وقتلك هجيبه قاتلي ماشي؟ قاله : أيوة بس مش النهردة ، دا لازم نوفر لها مكان ، عشان تعيش فيه ونشوفه تولد فين راح زميله قاله : يعني إيه هتولد فين؟ هتولدها في مستشفى الجلاء للولادة ، ما تتنيل تولد في أي حنة قاله : لا دا ليها طقوس عشان نعرف نجيب الخشبة اللي بتخبئها في الجحر بتاعها ، معلش رجعوا بقه ، فطبعا الراجل إتصدم صدمة العمر ، هيعمل إيه دلوقتي؟ وهيودي البلوة دي فين؟ وملحقتش يفكر كتير جاله الفرج ، ولقي اللبيس بتاع المطرب وكان شاب صغير وغاوي حيوانات قاله : أنا هخده حضرتك ، إشتريته بكام؟ قاله : أربعين جنيه قاله : إتفضل ، ونا هشيله في عربية المطرب لغايه لما نخلص شغل، وفعلا حصل وشاله ، جه المطرب يركب عربيته لقي ريحة فظيعة ومش عارف دا من إيه ، ومهما

فنانين لكن ظرفاء

حط معطر مفيش فايدة ، ومحدث جة في باله إن المخلوق ده تتطلع منه الريحه دي ، المهم عدي اليوم وخلص والراجل حمد ربنا إنه إتخلص منه ورجعته فلوسه ، وتاني يوم رايح الشغل لقي الولد اللبيس واقف في الشارع مستتية ، وفايده لفة الهدايا بتاعة إمبراح ، وطبعا جوه نفسه عمال يقول يارب ما يكنش اللي في بالي ، بس للأسف طلع اللي في باله صح ، اللبيس بيرجعله القنفد وبيقله: أنا مش عايزه، دا قلب ريحة الشقة ، فراح رادد عليه الموسيقى وقايله: أنا مليش دعوة إنت إشتريتته وخلص و فراح اللبيس يشتكى المطرب ، والمطرب حكم إن القنفد يرجع لحضن أبوه الأولاني . وطبعا أسئلة بتدور في دماغه هيعمل بيه إيه تاني؟ وراح عامل عرض مغري للبيس وقاله: أنا هديك فلوسك بس خده ، رد اللبيس قاله : أنا مش عايزه خلاص. ووقف صاحبنا بعد أما خلص شغل ماسك القنفد يدلل عليه إن حد يربيه ، محدش عايز ، وفتح الكيس ونزله عالارض ، لقي القنفد مش عايز يمشي ، يزقه برجله مفيش ، يزقه بايده أبدا ، والفرقة كلها ميتة من الضحك وقالوله أحسن حاجة توديه للراجل أحسن . وبعد ضغط صاحبنا نزل السوق تاني ، بس إكتشف إن الراجل مبيجيش غير يوم الجمعة بس، طب يعمل إيه بالبلوة دي ؟ هيقعد بيه إسبوع تاني ؟ يعني حنة الفار ده هيكون سبب في طلاقه ، راح في ثواني فتحله الكيس وساعتها لقي القنفد فريرة وإختفي ، تحس

فنانين لكن ظرفاء

إنه كان عارف منطقته وما صدق لقاها ، وبعد إسبوعين كان صاحبنا نازل السوق تاني ، لقي الراجل بتاع القنafd وحكاله عالريحة واللي عمله ، قاله الراجل : أمال أنا كنت بحطه في الجردل ليه بتاع المية ؟ عشان ريحته طبعا ، حضرتك مبتشفش أفلام كرتون لما بيجيويه بيعمل روايح ؟ ، ومن ساعتها حلف صاحبنا ما يصدق زميله أبدا اللي دبسه في القنفد ، واكتشف إن الخير اللي بييجي من وراه هو الريحه المعفنة بس .

المطرب الكذاب

كان في مطرب كذاب كذب ملوش حل، يقعد يشطح بخياله ويحكي مواقف لفرقة وللناس كلها كذب، وفاكر إنهم مصدقينه، بس الحقيقة في ناس مش عايزين يخرجوه، وناس تانية خايفين يقلب عليهم ويمشيهم من الشغل، بس كان فيه واحد من الفرقة دايمًا يحب يخرجه، يعني مثلًا مرة شافه وهو بيتطلب منه أغنية من زبون، وعامل زي التلميذ الخايب في الإمتحان واللي عليه: مش معايا، فيطلب الزبون أغنية تاني يقله: مش معايا، فقعد الزبون يقله: أمال إنت معاك إيه؟ إنت جي تغني حاجات علي مزاجك، وقعد يطول في الكلام معاه، فراح بعد أما خلص سأله اللي الموسيقي اللي من فرقة وقاله: هوه كان بيقلك إيه؟ قلّه: لا دا طلع صاحبي وببسألني فينك؟ وعامل إيه؟ ومش باين ليه؟، فراح رادد عليه الموسيقي وقاله: أنا شايفه عمال يقلك إنت مش حافظ حاجة، وكل ما يطلب منك حاجة تقله مش معايا، فطبعا المطرب يقلل منه ويتضايق بس مبيبينش، وجه في مرة من المرات كان المطرب عامل إجتماع مع الفرقة، وكان قبلها مواعدهم إن همه عندهم مجموعة حفلات في شرم الشيخ، فسأله واحد من الفرقة في الإجتماع: هوه

فنانين لكن ظرفاء

إحنا هنسافر شرم إمتي يا نجم؟ فرد عليه المطرب قاله :
شرم إيه يا حبيبي؟ إحنا رايعين إيطاليا، وبدأ بخياله
الواسع يحكي: أنا كنت ماشي في الشارع ندهلي واحد
قالي : مش حضرتك النجم فلان قلته: أيوة ، قالي: أنا
قالب عليك الدنيا ، عاوزك في مجموعة حفلات في
إيطاليا وإديني تليفونك ، وبدأت ناس من الفرقة اللي لسه
ميعرفوش إنه هوه اللي معلم الكذب لمسيمة الكذاب
تسألته : يعني نعمل الباسبورتات؟ يقلهم : أيوة ، واحد
يقله : الفرقة كلها هتتطلع؟ ويقله : أيوة كلكم طالعين ،
يرد واحد من اللي بيشيل الآلات: وإحنا كمان طالعين؟
يرد يقول : طبعاً دنتوا قبلينا ، فبدأ صاحبنا اللي غاوي
يخرجه يتخفق من كدبه وراح قايله : طبعاً هتقلنا الباص
بتاع الفرقة كمان طالع بالسواق، فضحكت الفرقة كلها،
ومن ساعة الموقف ده إتلكله لغاية لما مشاه من الشغل ،
عشان يكذب براحته من غير ما حد يعترض عليه.

قسوة أب

مرة رحنا نزور زميلنا في البيت ، وزميلنا ده كان مطرب في بداياته . خبطنا ودخلنا لقيناه وشه قافل من حاجة ، أو زعلان ، أو متخانق ، المهم أول ما دخلنا سألناه مالك ؟ قال: مفيش متخانق مع أبوية شوية ، محطناش في دماغنا ، مهو كل البيوت كدة عادي ، دخلنا الصالة لقينا أبوه بدأ يكمل الوصلة معاه، تقريبا ملحقش يخلصها لما راح يفتحنا الباب ، وبدأ يقول لصاحبنا: يا ابن الكلب يا فاشل ، إنت عمرك ما هتبقى حاجة، أنا مش عارف أعمل معاك إيه ؟ فبدأنا ننتبه ونسأل نفسنا ؟هوه مثلا سقط في الثانوية عامة ؟ بس ده مش معاد إمتحانات ولا نتيجة الثانوية العامة ، ثم إن زميلنا ده دبلوم !، وحتى الدبلوم لسه مفيش إمتحانات ، المهم مطولناش كتير لقينا أبوه بدأ يشهدنا ويقلنا : ابن الكلب بيغني من مقام البياتي وراح مقام نهاوند مش عارف يرجع تاني للبياتي ، طبعاً إحنا كتمنا الضحك كلنا ، وبقي كل واحد فينا ببسأل نفسه بقه كل الغاغة دي اللي عاملها عم الحج عشان كدة؟ ، شوية لقيناه بيكمل: قول يلا ، فصاحبنا إبتدي يغني تاني ووصل عند المكان اللي بيعطل فيه وبدأ أبوه بيستقه تاني ويقوله : إرجع يلا، قول يلا، والواد عمال يزن ، ويطلع بصوتة ، ويهز في رقبتة، ويقوم ويقعد ، ومفيش أي محاولة ناجحة يخرج بيها من متاهة جحا دي ويخلص من

فنانين لكن ظرفاء

التهزيق ، المهم كان فيه عازف ناي موجود معانا، راح مطلع الناي ولسه هيرجعه، قام أبوه قله : عالية الطلاق ما حد يعزفله حاجة ، هو اللي هيرجع ابن الكلب لوحده ، وفين وفين لما خلصنا من الصداق ده، وإكتشفنا في الاخر إن أبو صاحبنا ده ملحن متمكن بس للأسف مشتهرش وكان عايز يشوف ابنه حاجة كبيرة في الفن.

ظروف خارجة عن الإرادة

بعد ظهور المايك اللاسلكي (الوابر لس) طلعت موضة كدة ، إن المطرب يغني موال من برة كنوع من التشويق ويقوم مرة واحده عامل مفاجأة ، بخ للناس ، الإختراع ده بقه فاد زميلنا في وقت قاتل ، . كان فيه فرح كبير والمطربين كلهم طلعا ، وجت معاد فقرة صاحبنا عشان يغني ، وبعد ما قدموه لقوه عمال يغني موال وطول فيه ، يخلص يقوم يخش ويعيد موال تاني، والناس عايزة ترقص وتفرح ، مش قاعدين في قهوة ليالي الحلمية يسمعوا مواويل ، وهو شغال مواويل يخلص واحد يخش في التاني ، لغاية لما ظهر النجم أخيرا بعد طول إنتظار ودخل الأغنية، فالفرقة والمعازيم ببسألوه وسط الدوشة سبب تاخير كده ؟ قام قايلهم الحقيقة ، البيه المطرب كان عنده إسهال وقاعد في الحمام يقول في مواويل عقبال ما يخلص براحته ، فطبعاً كل الناس ماتت علي روحها من الضحك وعذروه .

مطرب مبروك

كان في مطرب وهو بيغني في الأفراح بييجي عند حنة معينة ويقول : واحد إثنين ثلاثة ونص فين السقفه ويا الرقص، ويخلي الطبله تتطبل ، فمرة كان شغال في فرح من الأفراح والناس هايسة وزحمة ، وأول ما جه يقول الحنة بتاعته : واحد إثنين ثلاثه ونص ، قامت سماعة كبيرة وقعت عالارض، وخذت في وشها عيلة صغيرة ، وكل دا مهمش الناس إن السماعة وقعت أو العيلة الصغيرة فيها إيه ، قد ما كان المهم بالنسبالهم يعرفوا ده مطرب ، ولا ساحر ، ولا راجل مبروك ؟ وإزاي قدر يتوقع اللي هيحصل وكأنه بيقدم فقرة سحر.

أنا ظابط

الموسيقيين في الأشغال بتاعتهم كل واحد ليه أقدميته في الشغل زي أي شغل ، فمرة كان موسيقي كل ما حد من زمائله يعمل حاجة متعجبهوش في عزف أو أي ترتيب للشغل ، يقلهم: أنا هنا المسؤل ، أنا الظابط ، كله يسمع كلامي ، وإتكرر الموضوع دا كتير ، لغاية لما جه مرة واحد من فرقة تانية كان حاضر وسامع ، فقال لواحد من الفرقة : إيه ده؟ يعني إيه هوه الظابط؟ فرد عليه الموسيقي ، وكأنه ما صدق يقول اللي كاتمه جواه من سنين وقله: أيوه يا سيدي أصل اللقب دا واخده لما كان في بلدهم ، وكان أول نزيل لمستشفى المجانين اللي فتحت عندهم ، وخذ اللقب دا من ساعتها ، فرد عليه الموسيقي المنتحل للظابط قاله: أنا مجنون يعني؟ ، فرد عليه الموسيقي تاني وقاله : أمال إنت فاكر مشغلينك هنا عشان فنك؟ إحنا بنعمل عليك دراسة دكتوراة إسمها (أثر إستجابة المجانين للعلاج بالموسيقي) ، وكان طبعارد في الجون غير متوقع كل الحاضرين ضحكوا عليه.

ملحن ومطرب

ملحن كان في بداية حياته ، وجتله فرصة يعمل لحن لواحد من مطربين الشباب المشهورين وقتها ، والمطرب ده رغم شهرته إلا إنه بيغني علي قده قوي ، بس ربنا ممشيها معاه ، المهم إتجزز الإستوديو وبدأ المطرب في الغنا، وبدأ يخرف ويقول لحن غير اللحن ، ولو قال حنة صح بيكون نشاذ فيها ، وبدأ الملحن يكلم نفسه علي حظه المنيل والفرصة اللي ضاعت ، المهم المطرب خلص التخاريف اللي قلها ومشى ، والملحن فضل زعلان جاله مهندس الصوت وكان صاحبه وقاله: متزعش نفسك ، تعالي جمبي وهات كرسي ، وقلي اللحن بيقول إيه حنة حنة ، ونا عندي برنامج نزل جديد إسمه ميلوداين بيرسم صوت المطرب ونخليه يغني حنة حنة علي اللحن اللي هنديهوله، الملحن فرح وعمل كده وقعدوا ساعات عقبال ما خلصوا اللحن ، وكان المطرب غني أحلي ما عنده ، جه المطرب تاني يوم يسمع الأغنية عجبته جدا ، وراح قايل للملحن: إيه ده! أنا معرفش إني غنيت حلو كده رغم إني كنت عيان ، لو كنت سليم بقه كنت أبدعت عن كده ، و راح باصص الملحن للمهندس ومحدث فيهم نطق من البجاجة واحتفظوا بالسر ليهم.

هاتوا العصايا

واحد من الفنانين كان أغلب الوقت زيه زي غيره ،
بيبقي شغال طول الليل ونائم بالنهار يعني مبيشفس عياله
غير تخاطيف ، فمراته كانت علطول عملا له هيبه مع
ولاده اللي مبيلحقش يقعد معاهم ، وأي حاجه يعملوها
تقلهم لما أبوكوا يصحي يشوف شغله معاكم ، فالعيال
تخاف وتكش ما همة بيسمعوا تهديد من الأم علي حد
بالنسبالهم شبه مجهول ، ميعرفهوش فرسموا صورة إن
أبوهم ده لو إنترفز هيزلزل الأرض ، وجه يوم من الأيام
بنته كانت عملت حاجة غلط ، ولما الأب صحي قعدت
الأم تحكي له وقالته : بنتك النهارده عملت ، قامت البنت
مقطعها: خلاص يا ماما والنبى ، فرد الأب بصوت أسد
: ها عملت إيه ؟ فحكته الأم وطبعا البنت وشها جاب
ميت لون مستتية المصير المجهول ، فالأب قام قايم من
مكانه وقال للأم : هاتي العصايا ، قامت البنت قالتله :
خلاص يا بابا والنبى مش هعمل كده تانى ، والأب مكمل
كلامه : هاتوا العصايا وهية تقوله: والله أسفه قام رايح
وجايب العصايا ، وفوسط الترقب من الكل قام مكمل
وقايل : (هاتوا العصايا عشان أرقص بيها الليلا دي دنا
مستتيا) ، وقعد يرقص بالعصايا ، وطبعا كان في كمية
كوكتيل فاخر من الحالات الموجودة ، حبة ذهول من الأم
علي ضحك من البنت والأب ، وقامت بصاله الأم قالتله:

فنانين لكن ظرفاء

تصدق أنا عمالة أعملك هيبية وبريستيج طول الوقت ،
ونت ضيعتها في لحظة ، قلها: أنا مبلحش أقعد معاهم
والشوية اللي هقعدهم أضربهم مينفعش طبعاً، البركة
فيكي.

ربنا لما يعوز

ملحن من الملحنين كان رايح يسمع مطرب مشهور شوية الحان وكان فيه فنانين كثير ، فالملحن كل ما يقول لحن المطرب يقوله : لا دا مش الجو بتاعي ، يسمعه حاجة تاني يقوله : مش عاجبني ، المهم راح مسمعه لحن أخير، وبعدها المطرب قله : لا مش حسه ، أنا هقوم أعملكوا عصير ، وسبحان الله دخل المطرب يعمل عصير قعد يدندن في أغنية طول مدة عملان العصير وخرج بالصنية وعمال يدندن ، ومرة واحدة قام قايل : أنا مش عارف عمال أدندن في حاجة من ساعة ما دخلت أعمل العصير ، مش عارف إيه دي؟ وراح قايلها بصوت عالي قام رادد الملحن بانتباه : ده لحنى أنا ، اللحن الأخير اللي لسه مسمعوا لحضرتك، قام رادد عليه المطرب : خلاص اللحن ده بتاعي بكرة تعملي التنازل بدام علق معايا كدة يبقى هيعلق مع الناس وفعلا الأغنية نجحت وكسرت الدنيا .

عياط ع الفن

كان شلة موسيقيين بايتين مع بعض في شقة واحد صاحبهم ، وكان من ضمن الشلة عازف أورج ، المهم كان قاعد عالكمبيوتر بيحمل حاجات وراح واخدها علي الموبايل ، وحط الهاند فري في ودنه وقعد يسمع ، وشوية دخل أوضة وساب صحابه ، وراح مطلع الأورج في الأوضة وقعد مع نفسه ، فصحابه بعد كام ساعة سألوا بعض هوه نام ؟ ولا راح فين؟ ، طب مييجي يقعد معانا القعدة دي مبتكررش ، المهم واحد منهم قام يشوفه لقي نور الأوضة مطفي ، إفتكره نام ،بس قبل ما يخرج من الأوضة ويقفل الباب ، سمع صوت عياط هيسثيري فولع النور شاف صاحبه هوه اللي بيعيط ، قعد يقله : في إيه مالك ؟ وده متشحتف من العياط مش عارف يتكلم ، وقام صاحبه منادي باقي زمايله من برة ، وإتلموا عليه كلهم مخضوضين ويسألوا فيه مالك بيني ؟ ، وده عياط مش عايز يقف ، قالوله الحج كويس؟ طب أمك بخير ؟ حصل حاجة ؟ وهوه مش قادر يجمع كلمتين علي بعض ، وقعدوا يهدوه ويطبطبوا عليه لحد ما مسك نفسه شوية بس بيعيط برضه ، قالوله في إيه؟ راح قايلهم : أنا

فنانين لكن ظرفاء

مشغل مزيكاً تركي من الصبح مش عارف أعزف زيهم
الناس دي ملبوسة الناس دي كفرة إحنا جمبهم حمير وقام
معيط تاني وطبعاً خد كمية شتايم لا توصف .

سم في الشغل

كان في مطرب شغال حلو جدا ، ويوميا بيشتغل أكثر من حفلة والدنيا معاة زبادي بالعسل ، وكان معاه فرقة كبيرة ، فجه في يوم واحد من أعضاء فرقته إسمه سيد غاب لظروف زي أي حد ما بيغيب، والمطرب إشتغل أول حفلة، وراح بفرقته علي الحفلة الثانية ، وقبل ما يوصل للمكان إتصل بيه مدير المسرح وبلغه إن المكان فاضي مفيش فيه ناس والحفلة إتلغت ، فمحطش في دماغه وقعد هوه وفرقته علي كافية شوية عقبال ما يبجي معاد الحفلة الثالثة ، وقبل ما يتحركوا جاله برضه خبر إن المكان فاضي وبرضه مرحش ، وفضل طبعا مكمل قعدة عال كافية لحدما يبجي معاد الحفلة الرابعة اللي برضه إتلغت في الآخر، فراح قايم واحد من أعضاء الفرقة بنرفزة وقال: الله يخربيتك يا سيد حطتلنا سم في الشغل .

أعمل إيه

كان في مرة زبون ثقيل سهران في مكان وعمال يرمي فلوس علي المطرب اللي شغال ، وكان الزبون ده قاعد معاه ناس علي الترييزة من ضمنهم واحدة طلعت مطربة ، فطلب الزبون من المطرب إنه يخليها تغني ، وطبعا المطرب رحب جدا فهو أكيد الزبون بقه هيرمي عليها فلوس بالهبل ، وطلعت المطربة وراحت للفرقة وقالتلهم : هغني أغنية للمطربة انغام وكانت أغنية لسه ناوي عالرحيل ، وقالتها في الأول بأداء موال ، وإتفاجئت الفرقة بتجعير وصوت نشاذ غير عادي ، وجات في حنة بتقول: أعمل إيه في الوحدة ونت مش معايا ، وقعدت تعيد وتزيد في كلمة أعمل إيه ، أعمل إيه ، أعمل إيه ، وطبعا بصوت وطريقة مستفزة لأي وذن فنان ، وهية واحدة مقلب في نفسها والزبون مبسوط ، فكان فيه واحدمن الفرقة قاعد صابر وساكت وهية شغالة: أعمل إيه أعمل إيه، قام قايم من علي كرسيه وقلها: عملي إيه ؟ تسببي المايك حالا وتنزلي .

الهيئة ضاعت

في وقت إنتشار الكورونا كان لازم كل واحد يلبس الكمامة عشان الإجراءات الإحترازية ، وكان فيه موسيقيين كثير بتلبسها وهيئة داخلية الأماكن ، فكان في واحد من الموسيقيين راسم دور إنه محافظ القاهرة ، أو وزير في إجتماع مع الرئيس، يلبس شيك ويقف بتناكة ، وكان الموسيقي ده تخين قوي ، وبرغم تخنه حاسس جواه إنه عميد معهد الباليه ، المهم الموسيقي ده كان لابس طقم شياكة ، ومطلع سلسلة جنزير من فوق الهاي كول زي أفلام نور الشريف لما يطلعوه في دور ابن ناس، وكل ده ولابس كمامة سودة شكلها غريب وواقف بتناكة قوي ، وهو في عزتناكته دي ، جاله واحد من صحابه بس في فرقة تاني وأول ما شافه ، قام ماسكه من الجنزير وشده وقله : كاتش عليه يا ريكس ، وطبعاً ضيع هييته وكل الناس قعدت تضحك لأن فعلا الكمامة مع الجنزير مع تخنه كأنه كلب حراسة شرس ملبسينه كمامة .

الفن ابتسامة

كان في مسابقة فنية بتتعمل كل سنة في هيئة من الهيئات التابعة للدولة، واللي كان بيحط الشروط بتاعتها في فترة من الفترات متخصص في الفنون، وكل مرة بيختارها إسم ومضمون مختلف عن المسابقة اللي قبلها، يعني مثلا يسميها (الفن شعبي) يبقى الشروط أغنيات شعبية ونصوص المسرح تبقى من التراث الشعبي، ومرة يسميها (الفن جنوب) تبقى أغنيات نوبية أو أغاني صعيدية، ونصوص المسرح تبقى باللهجة الصعيدي وكده يعني، المهم اللي بيحط الشروط ده قبل الإعلان عن المسابقة الجديدة والده توفى وبعدها حصلته مشاكل أسرية، فكان حابب يخرج من المود ده وراح مسمي المسابقة (الفن إبتسامة)، وكانت الشروط عبارة عن أغاني مونولوجات لإسماعيل ياسين، وشكوكو، وأغاني أفلام كوميدية، ونصوص المسرح كان شرط تكون مسرحيات كوميدية، وفعلا الشروط نزلت وبدأت الناس تجهز وبدأ رحلة تحكيم المسابقة وكان لجنة التحكيم اللي معاه أربع أفراد أو خمسة، وكان أغلب الفرق المسرحية اللي شافها في منتهي السخافة وتقل الدم، وآخرهم كانت مسرحية من ساعة ما بدأت لاحظ حاجة غريبة فيها،

فنانيين لكن ظرفاء

الكلمة بتتكرر تلت مرات ، يعني الممثل يخش يقول : يا شيخ همام ياشيخ همام ياشيخ همام فيرد عليه يقوله : أيوة أيوة أيوة عمال تقولي يا شيخ همام يا شيخ همام ياشيخ همام ونا أفلك أيوة أيوة أيوة ومقتليش حاجة ، وفجأة قام المحكم من مكانه ، وكان ساعتها معاه إثنين بس محكمين، وراح قايل للمخرج: أنا لو عامل المسابقة إسمها الفن سخافة مش هتبقى بالمنظر ده ، وبعدين عمال تعيد وتزيد في الكلمة تلت مرات ليه عشان إحنا تلت محكمين يعني ، الحمد لله إن مجيناش إحنا الخمسة كنت كررتها خمس مرات . الموضوع بقه مخلصش لحد كده ، ده طول الطريق يضحك هوو والمحكمين زمايله عالوقوف ويعيدوا الكلام تلت مرات زي المسرحية ، حتي وهوو مرووح قلمهم : مع السلامة مع السلامة مع السلامة، وهمة قالوله : الله يسلمك الله يسلمك الله يسلمك.

مش هديك العود

كان في مطرب معاه فرقة كبيرة ومعاه عازف عود في الفرقة ، والمطرب ده كان بيحب وسط الشغل يقدم فقرة عالعود ، فينده عازف العود اللي معاه يديله العود عشان يعزف عليه ، وكل مرة يعمل كده وعادي ، لحد ما جه تلت أربع أفراد من الفرقة المعروفين بالمقالب والضحك وإستلموا صاحبنا عازف العود وقالوله : يعني إنت كده ملكش لزمة ؟ كل شغلتك تديله العود يعزف وبس ، يعني إنت في نظره عباره عن حامل للعود ؟ وقعدوا يشحنوا في الراجل وقلهم : طب أنا أعمل إيه دلوقتي؟ ، قالوله : لازم تعمل لنفسك شخصية في الشغل ولما يطلب العود قلّه لا مش هديهولك ، إبقى هاتلك عود. والكلام خلص علي كده ، وبالليل المطرب شغال وراح منادي في المايك وقال : العود ياشباب ، فراح صاحبنا باصص لزمائله اللي شحنوه لقاهم بيبصولة بصة ، اللي هوه معناها عيب والله هتفضل كده لإمتي؟ ومرة واحدة قام صاحبنا حاضن العود جامد وقايل للمطرب: مش هديك العود ، والمطرب مستغرب وعمال يقله : العود ياشباب العود ، وده اللي عليه : مش هديك العود بقلك، مش هدهولك ، العود ده بتاعي ، هاتلك عود ، وطبعاً الفرقة ميتة من الضحك

فنانين لكن ظرفاء

عالموقف وكانت النتيجة إن المطرب مشاه من الشغل ،
فجم التلت شياطين بعدها كلموا المطرب يرجعه الشغل
تاني وفعلا كام يوم ورجع ، قاموا ماسكينه تاني وقالوله:
بص إنت بعد كده أول ما يقلك هات العود تبوظ الأوتار
بتاعته خالص ، وطبعا هيبجي يعزف هيلاقى الصوت
نشاذ ، ومش هيقلك هاته تاني. وفعلا صاحبنا نفذ كلامهم
بالحرف كأنه متنوم تنويم مغناطيسي ، وأول ما المطرب
طلب منه العود قام مبوظ الأوتار كلها ، والمطرب
معرفش يعزف عليه ، ويدور علي العازف لقاه راح
الحمام ، وعرف طبعا إن الحركة مقصودة ومشاه
المرادي من الشغل بس للأسف بلا عودة.

هوه ده الأيقاع

كان في مطرب مصري بيغني خليجي وبيلبس لبس الخايجيين ، يعني جليية وعقال لزوم الشغل ، وكان مبيفهمش في أسماء الإيقاعات الخليجية ، فعازب يطلب إيقاع معين من الطبال ومش عارف يوصله شكل الإيقاع أو التركيبة المعينة اللي عازبها ، لحد ما ففقد الأمل ومبقاش يطلب منه ، وكان الطبال ده هوة الكل في الكل ، ومسئول عن أي حاجة خاصة بالدخلات والجمل الإيقاعية ، وكان كل عناصر الإيقاع معتمدين عليه لدرجة كل يوم وكل مكان يشتغلوا فيه يسألوه ؟ علي نفس دخلات الأغاني اللي بتنتال ، فجه في مرة عازف الإيقاع ده إتخفق من التكاسل بتاعهم وقرر ميقلمش حاجة ، ومع أول أغنية هنتقال عمالين يسألوه الإيقاع إيه ؟ وهوه يبصلهم وميردش ، ويسألوه يقلهم: معرفش ، وبدأ المطرب يغني وكل واحد في الإيقاع بدأ يفتي ويعمل أي خاطييطا ، اللي بيعمل زار ، واللي بيعمل إيقاع زفة العروسين ، وأي بتنتجان ، والطبال كاتم ضحكته بالعافية ، وف عز الدوشة اللي شغاله لقي المطرب بينده عليه من بعيد في المايك وقاله : يا محمد يا محمد ، فمريضش بيصلة عشان عارف إنه هيقله إيه الدوشه دي ؟ وأظبط

فنانين لكن ظرفاء

الدنيا والكلام ده ، وفضل المطرب ينده علي محمد كثير
لحد ما قام بصصله وقاله : نعم قلّه : الله ينور هوه ده
الإيقاع اللي أنا طالبه منك من زمان يا أخي اخيرا عملتوه

نمن الألحان

من ضمن المواقف اللي قابلت واحد من الملحنين ، إنه أكثر من مرة يلحن أعمال لناس وميكنش معاهم فلوس فيدوله مقابل اللحن حاجة تانية ، زي أسلوب المقايضة بتاع زمان ، تحلق ببيضة ورغيف والجو القديم ده قبل إختراع الفلوس ، يعني مرة لحن تتر مشروع تخرج وكان تمنه قزازه برفان غالية ، ومرة ساعة ، مرة محفظة ، بس ف مرة طلب منه مطرب يعملوا لحن لكلمات جايبها ، وبعد ما الملحن خلص اللحن مستني يقبض ، لقي المطرب جي وجايله كلب عنده تلت شهور وقله : معلش ده حاجة بسيطة كده بس حضرتك إبقي طعمه عشان مش متطعم ! ، وطبعاً مبقاش عارف الملحن يضحك ولا يزعل ولا يتخانق ، قلّه : يعني أنا يتقال عليه إيه ملحن بكاب.

الموسيقي الناصح

كان في مطرب جه من دولة عربية عشان يشتغل في مصر، وقبل ما يشتغل قام مدير أعماله المصري عمل معاه عقد بشرط جزائي كبير في حالة إنه لو مشي قبل مدة العقد يدفع الشرط الجزائي، وإشتغل المطرب تمام وبدأ يتعرف والناس تتطلبه، وجه في يوم لقي مدير أعماله بيقوله: أنا بعثك لمدير أعمال ثاني وخذت فلوس منه وهو هيكمل معاك بنفس الشرط الجزائي، فطبعاً إستغرب المطرب جدا وقرر إنه يطفش من البلد بس فجأة، وفعلاً حجز تذاكر السفر وقبل ما يمشي قال لواحد من فرقته بس إنه ماشي وقله: متقلش لحد خالص أنا قتلتك إنت عشان إحنا أصحاب من قبل ماجي مصر، وفعلاً سافر المطرب، والفرقة بمدير أعماله الجديد جم عادي علي الشغل بما فيهم الموسيقي اللي عارف إن المطرب سافر عشان ليه باقي قبض مخدوش ولو الموضوع إتعرف الفلوس هتروح عليه، فراح الموسيقي ده بدري وأول ما شاف مدير أعمال المطرب قام حاطط نقطتين مية علي عنيه وخدوده عشان بيان إنه بيعيط، فشافه الراجل وقاله: إيه مالك خير بتعيط ليه، قلته: مراتي هتعمل عملية ومش معايا فلوس، راح مطلع من جيبيه:

فنانين لكن ظرفاء

وإداله القبض بتاعه كامل ، علي أساس بقه في شغل ،
وبدأ معاد الشغل يقرب ويتصل بالمطرب مبيردش فقلهم
: تعالوا عالقهوة يا جماعة شكل النجم راحت عليه نومه ،
وفعلا راحوا عالقهوة وبرضه راح معاهم الموسيقي اللي
عارف الحقيقة، وقعدوا يتصلوا طول الليل لغاية لما
عرفوا إن المطرب خلاص باي باي ، وفضل مدير
أعماله يبص عالموسيقي جامد ومركز معاه لأنه متأكد إنه
عارف لأنه صاحب المطرب ، وراح قايله بصوت
واطي : هوه إنت متعرفش إن المطرب مسافر ؟ ، فرد
عليه الموسيقي : يعني هكون عارف وهاجي عالشغل ! ،
فراح رادد عليه مدير أعمال المطرب وقاله: بقلك صحيح
معلش إديني الفلوس اللي إدتهالك عشان ممعيش وبكرة
أدهملك لما آجي أقابلكم عشان تقبضوا ، فرد عليه
الموسيقي قاله: لا معلش ده قبضي خلاص وخذته ،
وفضل مدير أعماله يبصله طول ما هو قاعد عالقهوة ،
ومرة واحدة راح منادي القهوجي قلّه: إييه أغلي حاجة
عندك هنا، رد القهوجي : سحلب بالفواكه والمكسرات ،
قاله : هات للأستاذ منه، فراح رد عليه الموسيقي وقلّه :
إشمعني ملوش لزوم خالص ، قاله : أصل بصراحة
مزجتني ولعبتها صح وطلعت معلم وإنت عارف إن
المطرب مسافر .

أُتفه واحد

مرة كان عازف شغال في فرقة جديد وبعد نزوله بكام يوم حصلته حالة نفسية ، وكان كل ما يوصل لمكان الشغل يقعد يعيط عياط هيسثيري والفرقة تهدي فيه ، وفين وفين لما يهدي ، وإستمرت الحالة دي اكر من إسبوع ، اللي يقله: إقري آيات قرآنية معينة، واللي يقوله: روح لدكتور نفساني ، المهم جه بعدها بيوم لقوا الإبتسامة علي وشه منوره، فواحد من الفرقة قله : ماشاء الله النهردة حالتك أحسن بكتير ، قام رادد عليه صاحبنا المتعافي وقله: الحمد لله أنا حاسس إني أُتفه واحد في الدنيا وعايذ أهنر وأضحك ، فرد عليه زميله وقاله: عملت إيه رحتم لشيخ ولا قريرت آيات معينة، قاله: لأ خدت برشام واحد كتبلي عليه ، فرد عليه صاحبه وقاله : بتاع إيه البرشام ده يعني ، قاله : بتاع شلل الرعاش والصرع، وطبعا كل اللي كان موجود وسامع وقع في الأرض من كتر الضحك.

أعد الليالي

مطرب كان متعود في فقرته يغني موال باللغة العربية الفصحى ، وكان الموال كلامه صعب ، وهوة علي قده في اللغة العربية في التشكيل ، عنده كله بايظ ، يحط ضمة مش في مكانها ، ويشيل كسرة ، وبيخترع دروس لغة عربية وهوه بيغني وفرقته نصها بيعدي عشان لقمة العيش ، والباقي مش ملاحظ أصلا لأنهم كانوا زيه في اللغة العربية ، المهم الموال ده كان في جزء بيقول : أعد الليالي ليلة بعد ليلة ، فكل ما يغنيه بتطلع منه أعض الليالي ، والفرقة عادي مش في دماغهم لغاية لما جه موسيقي جديد وإنضم للفرقة وكان دمه خفيف ، وأول مرة يسمع الموال منه ، وف عز ما المطرب متسلطن والمكان كله هدوء بيسمع الموال ، وأول ما جت الحنة وبدأ يقول : أعض الليالي قام الموسيقي قايل بكل تلقائية : هوهو هوهو ، وطبعا كل المكان بالفرقة ماتت علي روحها من الضحك ، حتي المطرب بعد أما يصله والشرار طالع من عينه ، لما لقي الناس بتضحك قعد يضحك هوه كمان ، ومن ساعتها كل ما يقول الموال ده ويبجي عندالحنة دي يبص للموسيقي عشان يقول : هوهو هوهو كنوع من الكوميديا وثبتها في فقرة الموال ده.

الدكتور السميع

في واحدة من الكليات المتخصصة للموسيقي ، كان فيها إمتحان للطلبة المختصين علي آلة القانون ، وكان واحد من الطلبة دي ميعرفش حاجة عن المنهج لأنه طول الليل بيغني في الأفراح والحفلات ، فالدكتور المسئول عنه زهق من كتر ما بيغيش وطبعاً كان لازم يخلي مسؤليته ، لإن الطالب أول سؤال هيتسأل فيه : إنت عند مين في القانون؟ فقرر الدكتور يدخل مع الطالب يضحي بيه ويبيعه ، وفعلاً دخل معاه وراح مسبق بالكلام وقال لرئيس اللجنة : الطالب ده مشفتش وشه طول السنة ، عمال بيغني شعبي في الأفراح ومث في دماغه الكلية ، وطبعاً الطالب فقد الأمل في النجاح بعد الكمين اللي إتعمله ده . ومرة واحدة لقي رئيس اللجنة بيقله : لو غنتلي موال شعبي حلو هنجحك في القانون ، وطبعاً كان الرد مفاجئة للكل ، وفعلاً مستناش الطالب وراح مغني موال إتمزج منه رئيس اللجنة وراح منجحه .

الفرقة والظابط

في أحداث ثورة يناير كانت شغلانة المزيكا في الضياع ، فكان الفنانين أول ناس قعدوا من الشغل وآخر ناس نزلوا ، وطبعاً كان في حظر تجوال عشان الانفلات الأمني وقتها ، فكان فيه شوية أماكن وقاعات بتشتغل بدري وتقفل قبل معاد الحظر ، فكانت في فرقة شغالة في فرح وخلصوا قبل معاد الحظر ، بس وهمة في السكة وراكبين الميكروباص بتاعهم دخل عليهم معاد الحظر ، وقابلوا لجنة وقفهم ، وبدأ الظابط يبص في الوشوش واحد ورا الثاني ، وجه عند واحد فيهم مربى دقنه وقام قايله : إنت إرهابي؟ ولا إخواني؟ ولا إيه؟ ، رد عليه الموسيقي : قاله يا باشا إحنا كلنا فرقة إرهابي إيه بس؟ تحب نغنيك ، وقبل ما الظابط يرد قال لصحابه : غني بيني إنت وهوة ، وبدأوا يطلعوا الآلات الإيقاعية وغنوا أغنية وطنية وقعدوا يصققوا ويهيصوا عشان الظابط يسيبهم ويعرف إنهم عالم فرفوشة ، قام الظابط بعد الأغنية ما خلصت قلمهم : حلو قوي برافو عليكم هنكمل السهرة بقعة في القسم ، وخدمهم كلهم وفضلوا يغنوله في المكتب لحد معاد الحظر ما خلص.

صاحب بيتهوفن

طالب دخل إمتحان مادة البيانو في واحدة من الكليات المتخصصة للموسيقي ، وكان من ضمن المنهج بتاعة مقطوعة لبيتهوفن حوالي ستاشر صفحة نوتة موسيقية ، وهو كان مخلص نصها بس ، المهم قرر يخش الإمتحان ويقول أي عذر ، دخل اللجنة لقا إثنين دكاترة ستات سألوه عن اسمه وقالوله: إبتدي إعزف ، وفعلا هو بدأ من هنا وبدأو الدكاترة يتكلموا مع بعض ، في مواضيع من الشرق والغرب ، حبة عن الموضة ، ومرة عن الطبخ ، ومرة وعن أحفادهم ، وبعد ما خلص الجزء اللي عارفه وكان ناوي يعتذر ، أول ما القاهم في ملكوت تاني ومش معاه اصلا ، صحا الفهلوي اللي جواه وبدأ يفتي، يعيد جزء أكثر من مرة ، ويضيف حاجات من عنده، يحذف جزء ، يدخل مقطوعة تانية في المقطوعة اللي بيعزفها وراح موقف عزف وقلهم : المقطوعة خلصت ، قاموا ساكتين وبطلوا رغي وسقفوله ، وقبل ما يحس بأي إنتصار ردت دكتورة فيهم وقالتله: مش كنت تقولنا إن بيتهوفن صاحبك وقبل ما يموت قلبك علي تعديل المقطوعة ، إتفضل إطلع بره إحنا بنسمع رنة الإبرة وإحنا بنتكلم هتيجي يا ابن إمبراح تضحك علينا ، وطبعا كان في نص هدومه وشال المادة .

مطرب التكنولوجيا

ظهر في فترة من الفترات أوائل الألفينات كده جهاز إسمه السيكونسر ، بيستخدموه في التوزيع الموسيقي عشان بييسجل أكثر من تراك ، يعني ممكن المطرب يطلع معاه عازف أورج بالسيكونسر وكان فرقة موسيقية كاملة شغالة ، بس طبعا الأغنية بتبقي متسجلة بمدة زمنية معينة من الأول ، ولا ينفع تزيد ولا تنقص ، المهم كان فيه عازف أورج عنده فرقة كبيرة وإقترح يزود السيكونسر عشان يدي باور وشياكة في الصوت ، وبدأ يعمل لكل مطرب في الفرقة شغله ، وكان معاه مطرب شعبي إعترض وقله: أنا بتاع أغاني فرفشة لازم أغني علي طبيعتي مش عايز حاجة تأيدني بوقت معين ، إفرض أغنية مش واكله مع الناس عايز أقتلها وأغني حاجة تاني هعمل إيه؟ لازم أفضل مستنتي لما تاخذ وقتها في السيكونسر وتخلص ، فرد عليه عازف الأورج قله : إحنا اللي هنعود الناس علي شغلنا ، وفعلا أصر علي رأيه ، وراحوا أول فرح ليهم وكل مطرب طلع غني أغانيه والدنيا تمام ، طلع بقه صاحبنا المطرب الشعبي ، وكل ما الفرحة يهيص وف عز المعمه الأغنية وقتها بيخلص وتقوم قفلة ، مرة ف مرة بدأت الناس تتضايق وتكلم

فنانين لكن ظرفاء

المطرب والفرقة : إنت ليه بتقفل علينا وحننا شغالين ، قعد يشرحهم قصة السيكونسر وطبعاً محدش فاهم حاجة كأنه بيشرح فيزيا للترييزة ، بعدها قرر المطرب إنه يرقص العريس والعروسة وراح طلب منهم يقوموا ، وفعلاً قام العريس وقله : معلش العروسة مش هترقص أنا مينفعش أرقصها وسط الناس ، وبدأت الأغنية تشتغل والعريس بيرقص ، وكان في الكواليس المخفية محاولات لإقناع العريس إن العروسة ترقص ، وبعد إلحاح من قرايب العروسة وإقناع قام العريس موافق إن العروسة تقوم ترقص ، بس كان خلاص وقت الأغنية علي الجهاز قرب يخلص ، وبدأ المطرب مستني الثواني الأخيرة زي اللي مستني قنبلة هتفرقع ، وأول ما قامت العروسة بكام ثانية الأغنية قفلت ، وبدون أي مقدمات ولا مبررات راح المطرب واخدله بوكس في وشه من واحد من قرايب العروسة ، وإتشتم هوه والفرقة ومن ساعتها حرموا يشتغلوا بالسيكونسر تاني.

أبو سنة

مطرب في فرقة كان عنده فرح يوم ظهور النتيجة بتاعته في الكلية ، وكانت النتيجة إنه شال ست مواد وهيعيد السنة ، راح المطرب الشغل عادي ولما جت الفقرة بتاعته وبدأ يغني لقي زمايله المطربين واقفين كورال وعايزين يخرجوه من المود ، وكل ما يقول : أرقص يا عريسنا يقولوه : يابوسنة ، فين الزغروطة يقولوا : يابو سنة وبدأت المعازيم تلاحظ الجملة اللي بتتكرر وبدأ يبقى في ضحك من الفرقة والمطرب ، وإستسلم المطرب وقعد يقلهم في المايكروفون : السنة الجية يقولوا : يابو سنة ، يقول : بكرة هتتعوض يقولوا : يابوسنة ، لحد ما جت فترة الإستراحة ودخول البوفيه وطلع مدير الفرقة : في المايك وقال أجمل التهاني لمطرب فرقتنا الجميل علي رسوبة في ست مواد ، وطبعا المعازيم فهمت الجملة اللي من بدري عمالة بتتعاد وقعدوا يضحكوا ، ولما طلع المطرب يغني تاني قعدت المعازيم تهزر معاه ويقولوه يابو سنة عايزين أغنية كذا والنبي يابو سنة .

عينك عالية

طبال جه إشتغل في فرقة رقاصة بعد أما الطبال بتاعهم ما مشي ، وطبعا علي رأي الفنان أحمد ذكي في فيلم (الراقصة والطبال) لما كان بيكلم الناس ويقولهم : الطبله هية الأساس ، فعلا كان بيتكلم صح ، لأن الطبله مع الرقاصة بتبقي هية الأساس ، ولازم عينيه تبقي معاها عشان يترجم أي خطوة أو أي حركة لجملة إيقاع ، المهم كان في الفرقة مطرب كل ما يطلع يغني يبص للطبال ويقله عينك عالية عشان لما أشاور ولا أزود السرعة ولا حاجة ، وطبعا الطبال مبيسمعش كلامه ، مهو مش معقولة برضه يسيب الرقاصة ويبصله هوة ، المهم الموضوع إطور لمشادة كلامية قبل ما يطلعوا الشغل وقعد المطرب يقله: أنا قلناك كتير عينك عالية إنت بتعند معايا يعني ولا إيه؟ ، المهم الفرقة طلعت تشتغل والطبال فضل مرقد للمطرب وعاوز ياخذ حقه بحرفية ، وجه عند حته معينه والمزيكا خففت الصوت، والمكان أي صوت فيه يتسمع ، وقام قايله قدام الناس : يا نجم يا نجم قام المطرب باصصله ، قام قايله : إعمل الرعشه بوسطك يلا .

الموسيقي والعبيط

كان في واحد مجنون ظهر فترة من الفترات في الشارع قدام فندق مشهور، ويتكلم بكلام مش مفهوم، متعرفلوش إذا كان عبيط ولا أخرس، وكان دايمًا بيلبس جلبية مقطعة مبيغيرهاش، وشعرة مففل وطويل، شافه واحد من الموسيقيين وركز معاه لقاه بنفس الجلبية المقطعة المهربدة بقاله كتير وصعب عليه لما لقاه مجنون وشافه بيجري ورا أمين شرطة بيضربه بالعصايا علي مؤخرته وهو طالع يركب الميني باص، المهم صاحبنا الموسيقي الإنسان الحنين كان بيشتري جلايب لوالده، وجه في دماغه المجنون ده، وقرر يشتريه جلبية يفرحه، حتي لو مش هيفهم هوة جايله إيه أصلا، وفعلا إشتري جلبية عشانه ودور عليه لقاه موجود في نفس مكان إقامته في الشارع قدام الفندق، ندهله وإدهاله، والمجنون بقه يبصله ويقول كلام مش مفهوم ويشاور علي نفسه، عايز يقله: هية دي ليا أنا؟ فرد عليه الموسيقي وقاله: أيوة، وشكله كان فرحان، وتاني يوم قابله لقاه بنفس الجلبية القديمة المقطعة، وقعد يشاورلة فين الجلبية؟ والتاني يقله: هابا هابا ويشاور علي مكان إنه شايلها فيه ويقله: إنه هيلبسها بكرة، وقعد أربع خمس أيام الموسيقي كل ما

فنانين لكن ظرفاء

يشوفه يسأله فين الجلبية؟ والتاني يقله : هابا هابا ، وفي الآخر تقريبا المجنون إتخفق منه ، قام حاطط إيدته علي كتفه وقاله : تصدق وتؤمن بالله جلبيتك في الحفظ والصون ، أنا كنت بصلي بيها الجمعة إمبراح ورا حبيب العادلي وزير الداخلية شخصيا ، وكانت صدمة قوية للموسيقي وجاله ذهول ، وبدأ يربط المواقف ببعض لما ضرب أمين الشرطة بالعصايا ومعملوش حاجة ، والجلبية اللي برغم شكلها المعفن ملهاش ريحة وحشة ، وبقة مش عارف يضحك ولا يصقله علي التمثيل الهائل ده وقاله : تصدق أنا اللي عبيط .

المركب الجديدة

في مركب سياحية فتحت جديد جمب مراكب سياحية قديمة ، فكان لو في فرقة عندها شغل في المكان ده بيبيلغوا بعض ويقوله : معادنا عالمركب الجديدة ، فبيفهموا إن المركب دي هية المقصودة تحديدا ، وعدت فترة كبيرة تخش في سنتين ، وكان في فرقة عندها شغل في المكان ده ، فاتصل مدير أعمال المطرب بالفرقة وقلهم : إحنا النهردة معادنا علي المركب الجديدة ، فرد عليه واحد من فرقته وقاله: أهى كلمة المركب الجديدة دي بتفكرني بالشاب خالد كدة بقة عنده ستين سنة وأسة إسمه الشاب خالد .

الفهرس

المحتويات

٤ الأنايبب
٦ الليل يا ميمون
٧ كوبري عباس
٨ البيز جيتار
٩ بيز جيتار ٢
١١ اللي يسمي خالد
١٢ شغال مع رقاصة
١٣ المطرب الموهوب
١٤ ما فيش أي واجب
١٥ المعجبة
١٦ الراب
١٧ إيه الكبروت ده
١٨ نبغي الأستاذة
١٩ بابا بابا
٢١ المطربة الكفيفة
٢٢ عازمين أرنب
٢٣ أحمد ملوخية
٢٤ جنات تجري من تحتها الأنهار

فنانين لكن ظرفاء

- ٢٥ عندي فرقة
- ٢٦ نشاذ
- ٢٧ العازف المرتبك
- ٢٨ صورتني في الجرايد
- ٢٩ هذا هو
- ٣٠ معاه ناس
- ٣١ الجديان
- ٣٢ غني من بفقك
- ٣٣ إرجع يا كحلاوي
- ٣٤ الزبون العجيب
- ٣٦ عامل مثقف
- ٣٧ الشغل شغل
- ٣٨ لبييا
- ٤٠ فرح بالإكراه
- ٤١ نصب
- ٤٢ وجهة نظر
- ٤٣ المطرب المعتمد
- ٤٥ الناموسة
- ٤٦ بيغنوا برة
- ٤٧ صدمة ملحن
- ٤٩ مطلوب دف
- ٥٠ مطرب يطفش
- ٥١ أكل العيش

فنانين لكن ظرفاء

- ٥٢ ناقر ونقير
- ٥٣ زيارة قنفذ
- ٥٧ المطرب الكذاب
- ٥٩ قسوة أب
- ٦١ ظروف خارجة عن الإرادة
- ٦٢ مطرب مبروك
- ٦٣ أنا ظابط
- ٦٤ ملحن ومطرب
- ٦٥ هاتوا العصايا
- ٦٧ ربنا لما يعوز
- ٦٨ عياط ع الفن
- ٧٠ سم في الشغل
- ٧١ أعمل إيه
- ٧٢ الهيبة ضاعت
- ٧٣ الفن ابتسامة
- ٧٥ مش هديك العود
- ٧٧ هوه ده الايقاع
- ٧٩ تمن الألحان
- ٨٠ الموسيقي الناصح
- ٨٢ أتفه واحد
- ٨٣ أعد الليالي
- ٨٤ الدكتور السميع
- ٨٥ الفرقة والظابط

فنانين لكن ظرفاء

- ٨٦ صاحب بيتهوفن
٨٧ مطرب التكنولوجيا
٨٩ أبو ستة
٩٠ عينك عليـة
٩١ الموسيقي والعبيط
٩٣ المركب الجديدة
٩٤ الفهرس

دار
البديع العربي
للطباعة والنشر
ت/ 01061635162

مهنة الفن زي كل مهنة ليها متاعبها ومواقفها بس المواقف الخاصة بالفنانين أغلبها مواقف فكاوية لأن بجانب الموهبة الفنية , عندهم كمان خفة الدم , وسرعة البديهة في الرد وتنظيم القافية , حتي في عز مشاكلهم ونرفزتهم في مواقفهم مع بعض , أوحتي مواقفهم مع الجمهور وده موجود عند الغالبية العظمي منهم, ومن خلال تعاملي مع الوسط الفني لأكثر من خمسة وعشرين سنة قابلت مواقف شخصية كتير تضحك , وسمعت مواقف من زمائل لية , وطبعا الكتابة عمرها ما هتبقي زي مشاهدة المواقف في لحظتها , بس قررت اني أجمع أظرف المواقف اللي عاصرتها , أوأحتكتلي , ويا إما ضحكتم زي منا ضحكتم , يا إما الكتاب ياخذ جائزة أبوخ كتاب وفي الحاليتين أنا اللي كسبان.

مصطفى أصيل

